

WANTOK



OCEAN BLUE

Tuna in oil
Rait teist
yah!



Wan Wik, Oktoba 20 - 26, 2005 NAMBA 1631

Niuspepa bilong yumi ol PNG stret!

K1.00 long Mosbi tasol - Ausait Mosbi K1.30



PHOTO: ANDREW MCLEER

PES 2:

Glasm i ken stopin hamere


FRABUK BAIBEL!!
Lukim Pes 8

PES 16 - 17:

Kaikol na kalsa - strong hamere

GLASIM GUT

Chief tok Australia mani i save kam long PNG i save go bek long ol. Australia savemanmeri mas klia pastaim long ol i opim maus. Lukim stori long PES 3





AVAILABLE FOR IMMEDIATE DELIVERY NATIONWIDE

Ela Motors

CLEARANCE OFFER

~~Was K8,299~~

EK40JMHL
Kerosene Outboard

- 40hp, 2 Stroke
- Low Fuel Consumption
- Parts & Service backup

SPECIAL PRICE

K8,299

Price Includes GST

Offer Expires: 31/10/2005



Port Moresby: Ph 3229400 Kokopo... Ph 9829100 Kimbe... Ph 9835155 Buka..... Ph 9835155 Wewak... Ph 8562255 Tabubil... Ph 5489060
Lae..... Ph 4781800 Kavieng... Ph 9842788 Lihir.... Ph 9864099 Vanimo... Ph 9864099 Madang... Ph 8522188 Alotau.... Ph 6410100

Turisirim i ken stopim hangere

Stephanie Waide i raitim

TURISIM long Papua Niugini em i wanpela industri we yumi mas lukautim bilong wanem, kalsa na pasin tumbuna bilong yumi ol Pasifik Ailan i fri, tasol i ken mekim bikpela mani bilong kantri.

Dispela em i as tingting bilong Namba 5 Saut Pasifik Turisirim konfrens we i kamap long Pot Mosbi long dispela wik.

Robert Igara, Sief Eksekutyutiv bilong PNG Sastenabol Developmen program, i tokaut olsem i nogat planti gutpela stori i save kamap long PNG long ol arapela kantri.

Em i tok panti taim ol nius manmeri tu i save soim ol nogut stori tasol.

Em i tok dispela i noken stopim ol manmeri husat i wok long turisirim industri long traim na apim nem bilong kantri.

Long wankain taim, Mali Voi husat i makim maus bilong UNESCO na tu i toktok long kalsa na turisirim, i tok, ol Pasifik Ailan kantri i mas amamas long ol pasin tumbuna bilong ol long wanem i nogat wankain ol tumbuna pasin olsem long ol arapela ples.

Mista Voi i tok, save bilong ol yangpela manmeri long ol kastom na pasin tumbuna i ken opim rot bilong ol long kisim mani.

Ol i ken painim wok insait long singsing, dantis, penim ol piksa, tainim tok o stori long ol tumbuna stori.

Dispela tu i ken



STRONG BILONG PNG: Kain ol naispela piksa olsem dispela ol i mekim long wesari i stap long soim strong bilong PNG ats. Foto: Nicky Bernard



PNG KAIKAI: Ol bikmanmeri bilong turisirim insait long Pasifik i bin gat sans long traim ples kaikai bilong PNG stret.

halivim long holim strong ol kastom bilong ol Pasifik Ailan.

Taim yumi amamas long ol pasin tumbuna bilong yumi, bai yumi laikim ol arapela kantri long luksave long ol tu.

Trevor Soufield bilong skul bilong turisirim na Leisa Menesmen long Australia i tok olsem turisirim em i wanpela bis-

nis we i ken halivim ol arapela bisnis insait long komyniti.

Turisirim tu i mas wok wantaim ol arapela bisnis long stap strong.

Em i surukim tok moa na givim tok piksa olsem, taim planti manmeri i kam long lukim PNG, ol manmeri husat i salim bilum bai gat mani.

Em i tok taim ol i gat mani, famili bilong ol i no inap long sot long mani o hangere.

Long wankain rot tu, sapos i nogat gutpela samting long soim o salim, nogat planti turis bai i laik long kam na lukim kantri.

Dispela bai daunim wok bilong planti bisnis insait long komyniti.

Maikro Fainens beng i stap long halivim

Stephanie Waide i raitim

BENG bilong maikro finans i stap long halivim ol manmeri i gat ol liklik bisnis insait long kantri.

Namba 5 Saut Pasifik Turisirim Kofrens we i kamap long Pot Mosbi i soim olsem i gat panti rot long statim turisirim bisnis, tasol save bilong lukautim bisnis na mani i wanpela hevi we i save daunim planti manmeri.

Robert Igara, Sief Eksekutyutiv bilong PNG Sastenabol Developmen program i tok beng bilong Maikro Fainens, we i stap long Konedobu insait long Pot Mosbi siti em i wanpela rot we ol liklik bisnis manmeri insait long

PNG i ken kisim halivim.

Em i tok ol wok manmeri bilong beng i save go aut long ol setelmen na ples na skulim ol manmeri long rot bilong bungim o sevim mani.

Mista Igara i tok, turisirim industri i ken gro sapos ol manmeri long ol ples i ken lainim long sevim mani ol i hat wok long wokim.

Em i tok tu olsem gavman i mas traim halivim turisirim industri long PNG.

Mista Igara i tok PNG i ken mekim bikpela mani tru sapos gavman i luksave long turisirim na skelim moa mani i go long en.

Long wankain taim tu, Misis Tauvasa, wanpela meri husat i wok wantaim UNESCO, wanpela bikpela opis

bilong Yunaitet Nesens we i save strongim wok developmen bilong ol pipel i tok ol wok bilong turisirim i ken kamapim bikpela senis.

Tasol save bilong lukautim bisnis na mani em wanpela hevi we ol ples manmeri i save karim olgeta taim.

Em i tok yumi long PNG i mas traim long strongim ol turisirim prodak bilong yumi bipo yumi karim i go aut na promotim long ol arapela kantri.

Misis Tauvasa i tok tu olsem taim ol manmeri i tingting long statim wanpela turisirim bisnis, ol i mas painim maket bilong ol pastaim long ol i statim.

Ol i mas painim kastoma inap long mekim bisnis bilong ol i ron gut.

Luksave long ol meri mejistret

Jeffery Elapa DWU sumatim i raitim

OL VILES kot long kantri bai gat ol meri mejistret long halivim long lukluk long ol raits bilong ol meri na ol pikinini.

Dispela bai bihainim ol senis gavman i mekim insait long ol kot sistem.

Dispela luksave i kamap long wanpela Human Raits na HIV/AIDS trening woksop bilong ol Provisel Viles Kot Opisa (PVCO) long Madang long las wik Fonde.

Deputi Dairekta bilong Viles Kot Sekreteriet, John Takuna i tok ol i no save luksave long raits bilong ol meri na ol pikinini bilong wanem ol man i save lukautim ol kot.

Em i tok ol man i save wan sait na wokim disisen long kot long sait bilong kastom. Planti taim ol meri na pikinini i nogat luksave.

Mista Takuna i tok sapos i gat ol meri mejistret, bai ol i ken senisim tingting bilong ol man na tu ol meri i ken stretim ol hevi insait long ol ples. Wok bilong ol bai wankain olsem ol man.

Long wankain taim tu, i gat trening bilong human raits. Ol Viles Kot Opisa i kisim dispela trening na dispela i halivim ol long kot wok bilong ol long ol provins bilong ol.

Mista Takuna i tok, bihain long dispela trening ol bai luksave long ol raits bilong ol meri na pikinini.

Viles Kot opisa bilong bilong Sauten Hailans provins, Mista Paul Wisup i tok dispela trening i halivim ol tru.

Em i tok, "ol i no save luksave long ol meri, na planti taim ol i save ting olsem ol meri em ol samting nating".

Nau ol meri i soim olsem save bilong ol i wankain olsem ol man.

Etvaisa bilong sekreteriet, Mista Justin Rogers i tok long wanpela ripot bilong Jastis Etvaisari Grup, ripot i soim olsem Viles Kot Sistem i wok gut.

Em i tok i nogat gutpela etministresen na i nogat inap mani long lukautim. Long dispela as tasol na Sekreteriet i painim ol nupela rot bilong stretim ol dispela hevi. Wanpela rot ol i painim em long kamapim wanpela data bes.

Em i tok dispela em i ken mekim rot long ol viles kot long salim ripot na kisim ol ripot, em i ken halivim tu long mekim inspeksen na kisim moa trening long bihain taim.

Sekreteriet i givim ol kompyuta, kar na ol bot long 10-pela provins tu.

Dispela ol samting em bilong trening bilong ol wok man bilong kot.

Em i tok ol narapela provins bai kisim ol bihain.



PNG stap 130 korap kantri long wol

Natasha Bodger i raitim

PAPUA Niugini i stap namba 130 namel long 159 kantri insait long wol we pasin korapsen i strong moa.

Wanpela wok glasim namel long ol siaman bilong Transparensi Intanesenel i soim olsem PNG em i sanap namba 130.

Long 2004, PNG i bin sindaun namba 102, tasol nau ol i tok PNG i pundaun i kam daun long 130.

Siaman bilong Transparensi Intanesenel PNG (TIPNG), Mike Manning wantaim ol arapela bod memba bilong TIPNG i tok olsem dispela wok glasim em ol lain bilong ol bikpela opis long Berlin siti long kantri Jemeni i bin makim 4-pela bikpela

indipenden opis long go pas long en.

Mista Manning i tok dispela yia 2005 i lukim PNG i sanap 130 na i soim klia olsem ol lain manmeri long ol arapela kantri i ting olsem PNG gavman i wok long traim liklik tasol long senisim pasin bilong korapsen.

Ol bod memba bilong TIPNG i tok ol i laikim bai ol manmeri insait long PNG i mas save olsem TIPNG i no

bin mekim dispela wok glasim, na ol manmeri long ol arapela kantri i wokim. Bikpela as tingting long dispela wok glasim em long skelim strong bilong bilip bilong ol bikmanmeri insait long wol long ol kantri i stap insait long dispela wok glasim.

Ol lain husat i go pas long dispela sevei o wok glasim i bin yusim ol askim we ol i bin kisim long ol manmeri

long wol na lukluk long strong bilong gavman na sindaun bilong kantri.

Wanpela bod memba bilong TIPNG, Richard Kassman i tok dispela wok glasim na namba we i soim sanap bilong PNG long 130 i no bilong pulim tingting bilong pablik i go daun.

Em i tok dispela nau i ken soim ol pipel olsem Papua Niugini i wok long lusim pasin korapsen isi isi na luk-

luk long kamapim gutpela sindaun long bihain taim.

Em i tok dispela wok glasim pepa i kamaut long wankain taim we ol pepa bilong ol arapela kantri.

Ol TIPNG bod memba i tok klia olsem planti mani na gutpela sindaun insait long ol kantri em i no klia hanmak olsem kantri i sindaun gut tasol ol i lukluk long strong bilong wok korapsen tasol.

PNG no save kisim olgeta helpim mani

...hap i save go bek long Australia

Neville Choi i raitim

PRAIM Minista Grand Chief Sir Michael Somare i tok Papua Niugini i no save kisim olgeta helpim mani Australia i save givim long wanem hap i save go bek gen long Australia.

Sir Michael i bin mekim dispela toktok taim em i bung wantaim ol nius manmeri bilong Nesenel Pres Klub bilong Australia long Tunde long dispela wik.

Em i tok planti save manmeri i stap long Australia i ting olsem Papua Niugini i no save yusim gut mani ol i save givim long ol progrem insait long kantri.

"Mipela i luksave long bikpela sapot na halivim i kam long gavman bilong Australia na ol pipel bilong en, tasol mi mas tok klia long sampela paul tingting long ol samting olsem helpim mani," Sir Michael i tokim ol niusmanmeri.

Em i tok PNG i luksave olsem dispela helpim mani em i mani bilong Australia na em i samting bilong Australia long yusim mani long laik bilong en. Tasol em i tok tu olsem sampela mausman long Australia i kranki liklik.

"Sampela toktok bilong ol mausman bilong Australia olsem PNG i save kisim olgeta dispela mani na i nogat gutpela kaikai long en em i wan-

pela paul tingting na i no stret.


Sir Michael i tok klia olsem long wan wan yia i go pinis, Papua Niugini i luksave olsem Australia i save givim samting olsem 300 milien Australia dola long wan wan yia. Mani i save kam long Kanbera bilong go long ol projek we AusAID na Insentiv Fan bilong Australia i save makim.

"Bai mi givim tok piksa long sait bilong konstraksen indastri. Tasol em i wankain tasol long ol arapela indastri insait long PNG. PNG gavman i makim wanpela projek long kisim helpim mani long Australia gavman na em i yet i givim hap mani bilong dispela projek.

Ol kampani we ol i rejista insait long PNG tasol ol Australia manmeri yet i bosim na lukautim i save winim olgeta kontrak bilong ol dispela projek, na AusAID i save givim tok orait long wanem ol kampani bai mekim wok.

"Ol PNG kampani husat i save kisim ol dispela kontrak em ol wan wan tasol. Dispela toktok olsem PNG i save kisim 300 milien Australia dola em i no tok tru," Sir Michael i tok.

Em i tok tu olsem AusAID i save mekim planti woksop insait long PNG. Edukesen na helt sekta i no save lukim ol dispela hap mani. Ol konstraksen na etvaisa olsem ol balus kampani na hotel we ol dispela woksop na



STRONGPELA TOK KLIA: Grand Chief Sir Michael Somare i no surik long ol askim i kam long ol nius manmeri bilong Australia.

kibung i save kamap i save kisim bikpela hap long dispela mani.

"Ol kain toktok olsem mani i kam long Australia bilong helt na edukesen insait long PNG long dispela yia em i planti milien samting i save pulim ai bilong ol manmeri bilong Australia.

"Mi laik tok gen, olsem mipela i givim bikpela luksave long helpim mani, maski ol rot bilong wok i no stret. Tasol mipela i no wanbel long ol toktok i kamap we ol i tok pasin korapsen i save kaikaim olgeta dispela mani insait long PNG ikonomi," em i tok.

Dispela toktok long helpim mani i kam long Australia em i wanpela bikpela samting tru we ol gavman na pipel bilong

Australia i save mekim ol kain kain sut toktok long en. Sir Michael i tokim ol Australia olsem ol i mas glasim gut ol kain paul toktok bipo ol i bagarapim nating PNG.

"Wanpela long ol bikpela salens tru we PNG, olsem wanpela developing kantri i save bungim em ol rabis toktok i save kamaut long ol mausman bilong Australia. Mi sore tru olsem maski i gat planti gutpela wok kamap i stap, sampela mausman long Australia i no luksave long ol. Olsem na mi singaut long ol niusmanmeri, politisen na ol saveman long givim luksave long sampela long ol senis dispela gavman i mekim na givim ol toktok long PNG we i gat trupela as long en."

Ol bikpela wok kamap Sir Michael i autim:

"Groa bilong ikonomi long nekativ 1% long 2002 i go antap long 3% long dispela yia;

"Wok ausait long wok maining i gro inap long 3.8% bihain long sampela yia we i nogat gutpela wok namba;

"Inflesen o prais bilong ol samting we bipo i stap olsem 15% nau i kam daun long 1% tasol;

"Ol Treseri bil ret i pundaun long 18% i kam daun olgeta long 4.5%;

"Pablik dinau na bekim bilong dinau i go daun olgeta we bipo em i stap long 70% long pinis bilong 2002, na nau i go daun long 50%; na

"Ol nupela wok bisnis i wok long kamap.





DISPELA wik i lukim kain kain bikpela bung i kamap. Stat long las wiken yet em ol bikmanmeri bilong turisim insait long Pasifik i bin kamap long PNG. Long wankain taim, Global Fan, wanpela bikpela ogenaisesen long wol i givim bikpela hap mani long kantri long pait agensim sik HIV/AIDS, sik TB na malaria. Kain kain pes i pulap insait long Mosbi siti nau.

NA stat long dispela wiken i kam, bai ol bikpela lida bilong Pasifik bai kamap long Mosbi long sindaun long bikpela Pasifik Ailan Forum kibung. Tru tumas, dispela yia em i yia bilong PNG bilong strongim sanap bilong em insait long Pasifik. I no long taim bai mipela kisim luksave bilong wol.

TASOL taim i gat planti bikpela kibung i kamap long wanpela taim, bai hevi i kamap. Em nau. Bikman i kamap long givim mani long helt sekta bilong PNG i bin sindaun longpela taim tru wetim namba tu bikman bilong gavman long kamap. Bikman i no kamap, na kaikai i kol nating. Laki tru na narapela bikman i bosim graun i makim maus bilong gavman na givim bikpela tok tenkyu tru. Tenkyu em i bikpela samting. Sapos wanpela man i givim yu moa long K166 milien, bai yu abrus na lusim em i stap wetim yu long bikpela kaikai olsem? Nogat tru.

LUKSAVE-i mas go long 'Chief' Somare long apim nem bilong PNG i go long ol niuspepa manmeri bilong Australia. Ating i gutpela na em i skulim ol liklik. Planti taim ol i save kam raun nating long PNG na ol i ting olsem ol i save gut long stori na pasin bilong yumi.

PALAMEN bai sindaun klostu taim nau na ai bilong olgeta manmeri bai stap long dispela tupela bil tupela memba bilong palamen i laik kisim tok orait long en. Em bai yumi lukim husat ol memba i gat tingting bilong kantri na husat memba i tingting long pulamapim bak bilong em tasol.





JUST ARRIVED - PRESENTATION A4 QUALITY COPY PAPER

1-99 reams
K13.97
PER REAM

100+ reams
K12.10
PER REAM

All Prices are Inclusive of GST.



data-max
Premium Quality White
A4 Copy Paper 80GSM

PRODUCT CODE : 4780

Waigani Drive, Port Moresby

Tel: 325 6500 Fax: 325 0302

Bogenvil bai ileksen i statrit pepa i aut tude

Veronica Hatutasi i raitim

BAI ileksen long rijinel sit bilong Bogenvil Otonomes Rijen (BOR) insait long Nesenel Palamen bai stat tude taim ol i givim aut rit pepa tude.

Provinsel Ritening Opisa Reitama Torowaru bilong BOR bai givim aut ol rit pepa long wanpela seremoni long Gavman Haus long Mosbi tude bilong opim rot bilong bai ileksen long rijinel sit we i stap nating bihain long John Momis i bin risain long dispela posisen long mun Epril las yia bilong resis long sit bilong presiden long Bogenvil Otonomes ileksen.

Voting bai stat long Januari neks yia na i go het long tupela wik. Na long pinis bilong mun yet, Bogenvil bai save long husat tru i nupela rijinel memba bilong ol long Nesenel Palamen.

Mista Torowaru i tok ol wok redi long bai ileksen i go het nau wantaim namba wan grup bilong ileksen opisa i bin go aut las wik long ol distrik bilong karimaut aweanes long Limitet

Preferensel Voting sistem (LPV). Na ol bai apdeitim tu komon rol long wankain taim.

Mista Torowaru i tok Bogenvil bai yusim nupela sistem bilong vot long namba wan taim.

Em i tok ol pipel i amamas long ol wok aweanes i kamap long dispela samting bikos em i nupela samting na ol i mas klia gut na vot.

Em i tok ol opisa i go tu long No Go Zon eria long karimaut aweanes bikos ol lain i laik putim wanpela kandidate long resis long rijinel sit.

Em i tok opis bilong ol long Buka i bin putim rekwas long K3 milien bilong karimaut dispela bai ileksen tasol lilektorel Komisin bai givim tasol K1.2 milien.

Mista Torowaru i tok maski ol i no kisim mak ol bin askim long em, ol bai traim yusim gut dispela manimak ol i kisim long em.

Em i tok Trensport em bikpela samting we bikpela mani i save lus long em.

I nogat save yet husat manmeri bai resis long dispela sit.

Siapan musik na kalsa grup soim stail



STAIL MUSIK: Ol meri bilong Siapan musik grup i soim stail bilong ol.

Natasha Bodger i raitim

EMBESI bilong Siapan i amamas long tokaut long wanpela kalsa grup bilong ol we i kamap long PNG long Tunde.

Minoru Endo Musik Faundeses bilong Tokyo i kamap long Papua Niugini na i amamas long bung wantaim kantri long makim tripela ten krismas independens na tu wok-bung namel long PNG na Siapan.

Dispela singsing grup i laik stap amamas wantaim ol PNG pipel na autim wanbel toktok long singsing na danis bilong Siapan.

I gat tripela ten (30) manmeri insait long dispela grup na ol i bin pilaim ol tumbuna musik masin olsem Japenis harp na harmonica na soim ol tumbuna singsing long Tunde nait long Mosbi.

Oganaisa na Pablik Relaisan Opisa Nachito Izumikawa i tok em i amamas long wanem ol pikinini na manmeri i singsing gut na amamasim ol pipel bilong Japan.

Embesi bilong Siapan i tok bikpela amamas tru long ol pipel bilong PNG na i laik tok olsem ol bai sapatim ol yet long taim nogut na gutpela taim.

Embesada Yamshita

Katsuo i tok dispela wok bung wantaim Gavman bilong Siapan na Minoru Endo Kalsa grup em long strongim pasin poroman namel long ol pipel bilong tupela kantri.

Em i tok olsem em i nambawan taim bilong dispela kalsa grup long kam long PNG na ol i amamas tru na laikim olsem planti manmeri long Pot Mosbi i mas kam lukim singsing bilong Japan.

Long nait bilong singsing konsert, Minista bilong Edukaisen Michael Laimo i tok long makim maus bilong PNG Gavman, ol i amamas long wok wantaim PNG.

Em i tok PNG em laki kantri long wanem ol i gat planti poroman olsem Siapan na dispela em wanpela as tingting bilong PNG gavman long kamapim planti poroman insait long Pasifik na long wol. Dispela nait tu bin markim win bilong wanpela Gret 9 sumatin long Gerehu Sekenderi em i winim singsing Siapan resis.

Leeroy Gilbert i tok bikpela amamas long Siapan Gavman na pipel bilong Siapan long wanem dispela resis prais bai karim em i go raun lukim Siapan.

Em i tok em i kirap nogut taim ol i kolim nem bilong em long wanem em bin lainim singsing long wanpela wik tasol.

Maria Enaga, sumatin long Gerehu Sekenderi i kam namba tu na Lawrence Saboa bilong Sogeri National High i namba tri long dispela singsing resis.

Minoru Endo grup bai perform long Rabaul long 19 na 20 de long mun Oktoba bihain long Pot Mosbi na ron bilong kalsa grup bai makim gutpela sindaun na fren namel long PNG na Japan.

Bihain long ron bilong kalsa grup, bai ol i givim sampela musik instrumen i go long ol sumatin long Matupit na Malaguna Primeri insait long Rabaul na tu soim ol long rot bilong yusim na pilaim.

Senisim lo bai sapatim moa korapsen

Toktok bilong Meja Lapu Rawali bilong Salvesen Ami na Asbisop Sir Brian Barnes bilong Katolik Sios

BILONG senisim Ogenik Lo long rausim pawa bilong Lidasip Kot long givim mekim save long ol palamen memba i wokim asua na korap pasin bai kamapim moa korapsen na paulim mani, Meja Lapu Rawali i makim Salvesen Ami Sios i tok.

"Ol Kristen Sios long PNG wantaim ol arapela patna na grasrut

em i makim 80 pesen long en i lukim kain lo olsem sotkat long ol memba i pulumapim poket na wokabaut i go aut fri, resepi bilong moa korapsen na paulim pablik mani na tupela lo long ol lida," Meja Rawali i tok.

Em i tok long larim ol palamen memba long kisim strongpela posisen long holim bikpela mani long han bilong ol sapos ol i senisim Ogenik lo bai soim olsem ol i bosim olgeta samting we i karamapim tu kot sistem long kantri.

Senis bai givim isi rot long ol palamen memba bilong ronawe long laik bilong em taim em i wokim rong na ino inap pret long lo moa, Meja Rawali i tok.

Long wankain taim, Asbisop bilong Pot Mosbi Katolik Asdaiosis Asbisop Sir Brian Barnes i tok lilektorel Divelopmen Fan i rong na ol i mas rausim.

"EDF i rong. Praioriti o wok we mani i mas go long en em long skul, helt na ol rot sevis. Ol i mas rausim," Asbisop i tok.



FIT MANKI: Leeroy, skul manki husat i winim singsing Siapan resis (sanap klostu long tupela lapun Siapan long rait han) i winim balus tiket long go raun long Siapan. Foto: Nicky Bernard



YELO TOP: Ol bilas ples sumatin i stailim tru long dispela bilas taim ol i wokim dukduk danis.

Vulupindi strong long tupela moa ilektoret

Steven Kadiko i raitim

MEMBA bilong Talasea open ilektoret John Vulupindi i stap strong antap long tingting na laik bilong ol pipel na lida bilong Talasea open i mas gat tupela nupela ilektoret long Hoskins open na Bialla Open ilektoret na i kisim namba i go long 3-pela ilektoret olgeta.

Mista Vulupindi i mekim dispela toktok long Kimbe long dispela wik Mande taim ol lain bilong ilektoret Baunris Komisn i mekim laspela wokabaut i go long provins long kisim ol las tingting na laik bilong ol pipel long ol nupela ilektoret. Nesenel Baunris Komisn i putim tingting i go long Wes Nu Briten.

Mista Vulupindi i tokim Komisn olsem ol pipel bilong Talasea distrik i sanap long tingting bilong olsem Talasea ilektoret i mas gat tupela moa ilektoret na i no Kandrien/Glosta ilektoret.

Em i tok, Komisn long lukluk raun bilong em long provins taim em i mekim namba wan raun bilong em, (Komisn) i bin go na toktok tasol

wantaim ol pipel na lida bilong Talasea Open ilektoret tasol ol i no raun long Kandrien-Glosta Distrik.

Mista Vulupindi i tok em yet olsem memba nau yet bilong Talasea Open i kisim bikpela hevi na taim tru long lukautim ol pipel bilong em.

Memba Vulupindi i tok em i hat-pela wok tru long wanpela memba i lukautim ol 128,000 pipel na long wankain taim, bringim sevis bilong gavman i go wankain long olgeta.

Em i tok em yet i sanap strong olsem em mas go tru olsem Talasea i mas gat tupela moa ilektoret wantaim ilektoret i stap nau, em Talasea open na bringim kaunim i go long tripela ilektoret. Em long Talasea Open, Hoskin open na Bialla open ilektoret.

Ilektoret Komisn Andrew Trawn i tok ol ripot na laik bilong ol pipel bilong Talasea i gutpela tru na em i samting bai Komisn i glasim na redim pepa i go long Minista i lukaut husat em Praim Minista yet Sir Michael Somare long autim long Palamen.

Watawi askim Akoitai long helpim

Aloysius Laukai i raitim

BOGENVIL i askim Maining Minista na memba bilong Sentrel Bogenvil Sam Akoitai long helpim Otonomes Gavman bilong em long sanapim maining polisi bilong em.

Ol i askim Mista Akoitai tu long helpim wantaim ol narapela developmen polisi long maining bisnis bilong Otonomes Bogenvil Rijen (ABR).

Vais Presiden bilong ABG Joseph Watawi i wokim dispela singaut bihainim sampela toktok we Mista Akoitai i bin mekim olsem bai nogat maining i kamap long Bogenvil.

Mista Watawi i tok go hetim ol samting i stap insait long Bogenvil Pis Agrimen em i wok bilong ol patna i stap insait long wok bilong painim gutpela sindaun long ailan olsem ABG, Nesenel Gavman na ol ovasis patna na olsem, ol memba bilong Bogenvil long Nesenel gavman i mas wok bung gut wantaim ol Bogenvil lida i mas

wok wantaim long luksave na redi long ol pawa Bogenvil bai kisim long em.

Mista Watawi i bin tok dispela em i bikpela samting na ol lida i noken mas abrus long trupela isu.

Em i tok maining long Bogenvil em i wanpela bikpela samting tasol i no gutpela long ol samting i kamap long ol yia bipo i holim bek yumi.

Mista Watawi i tok long nau, Bogenvil i laikim bikpela wok bisnis i mas kamap long helpim strongim wok mani bilong em.

Em i tok sanap bilong ABG long maining na ol arapela wok bisnis i stap insait long stetmen we Presiden Joseph Kabui i bin tebolim long ABG Palamen long las mun.

Long wankain taim, Mista Watawi i bin autim tok tenkyu bilong em i go long Mista Akoitai long kontribusen bilong em long stetmen bilong presiden long dibeit bilong ol ABG memba. I mas i gat gutpela wokbung nambel ol pipel.

Maunten Gabuna i pairap

....Toksave i go aut long pipel long noken dring wara we i bagarap pinis

Steven Kadiko i raitim

MAUNTEN Gabuna long Talasea Distrik insait long Wes Nu Briten provins i bin pairap long 10 kilok Sande nait wantaim liklik guria na bilakpela smok i go inap long bikmoring Mande long dispela wik.

Nau yet, i nogat ol masin bilong sekim ol maunten paia i stap long dispela maunten na as long dispela tasol pairap bilong em i sekim tru ol pipel na ol ples i stap klostu long maunten olsem Kilu, Garu, Ela na Garu Plantesen.

Dairekta bilong Provinsel Disasta Menesmen opis, Meja Paul Kaliop i tok i gat wanpela sotpela lukluk raun ol lain opisa bilong em i mekim wantaim halivim bilong ol wokman bilong Nu Briten Welpam (NBPOL) plantesen Hella na Garu i go long hap bilong maunten paia.

I gat ol graun maunten paia i tromoi i wok long pundaun long Garu viles na sampela ples klostu, na ol i bilip tu olsem ol wara bilong dring i bagarap pinis.

Meja Kaliop i tok ol pipel bilong ples i kisim toksave olsem ol i noken dring wara klostu long ples nogut i gat ol posin bilong maunten paia i bagarapim na i ken givim sik long ol pipel.

Nu Briten Welpam kampani i stat helpim pinis long givim ol saplai bilong klinpela wara i go long ples i painim hevi long maunten paia na ol i redi tu long rausim ol ivakuetim ol pipel sapos bikpela hevi i kamap.

Meja Kaliop i tok dispela maunten paia i bringim namba bilong ol maunten paia i pairap i stap insait long provins i go antap long 4-pela olgeta. Ol dispela maunten paia em Maunten Ulevun, Pago, Langla na Gabuna.

Wes Nu Briten provinsel gavman i wok hait long san na nait

wantaim long glasim dispela maunten paia na nau yet, ol i putim pinis ol aspies man bilong Garu plantesen long givim toksave i go long Rabaul Volkenolojikel Obsevetori.

Wes Nu Briten Etrministresen i redim pinis imejensi plen bilong wok bihainim sapos maunten paia i kamap strong.

Dispela imejensi plen ol i bilip Nu Briten Pam Oil Limitet (NBPOL) we em i bikpela welpam diveleopa i stap insait long en.

Nau yet, Rabaul Volkenolojikel Obsevetori Dairekta Ima Itikarai na Sinia Volkenolojis Steve Saunders i stap pinis long Kimbe wantaim ol masin samting we ol bai putim antap long Maunten Gabuna.

Provinsel Disasta opis i askim ol pipel long stap isi na noken pret tasol wetim ol toksave i kam long ol saveman. Ol i noken gat planti tingting.

FOR SALE COCONUT OIL MINI MILLS

Proven in Papua New Guinea for over 8 years
From 150kgms per hour input

Oil Expeller & Filter presses
With 7.5kw electric motors

Prices from K12,990 + GST

FULL RANGE OF SPARES ARE AVAILABLE

For more information, contact

AGMARK

Rabaul

Ph: 982 9055 / 982 9058

Fax: 982 9056 / 982 9047

Email: md@agmark.com.pg

PO Box 1921

The NGIP Group of Companies

Mur Iau!

GURIAS are the Champions

Vanimo-Wutung rot kontrakta lusim wok

Felix Ramram i raitim

LIKLIK lain wokman na ol kontrakta husat i mekim wok long putim kolta long Vanimo/Wutung rot i bin holim wanpela bung na lusim wok bikos ol i no amamas long no kisim alauwens long longpela taim.

Long dispela wik, ol kontrak woklain i bin blokim geit na opis bilong Dipatmen bilong Woks Edministresen Biding wantaim tupela bikpela masin na long stopim ol woklain

bilong go insait long wok ples. Ol ripot i tok dispela stop wok i kamap bikos bosman bilong Woks long Vanimo i isi tumas long stretim ol pepa wok na lukim olsem ol wokman na ol kontrakta i kisim pei bilong ol.

Ripot i tok ol wokman i no kisim kemping alauens inap klostu 10-pela potnait ovataim pe long tupela potnait, traveling alauens bilong go na kam long Aitape long kisim karanas.

Woks Vanimo i feil tu long baim ol haia trak na masin bilong ol kontrakta husat ol trak,

masin na wokman bilong ol putim kolta long Vanimo/Wutung rot.

Man i go pas long dispela stop wok, Johnny Bafek i tok ol wokman i lukim dispela hevi i stap longpela taim tumas. Na ol i mas mekim sampela samting olsem bai ol bikman i luksave na stretim ol bikos laip bilong ol na famili long taun i hat tumas.

Mista Bafek i tok Dipatmen bilong Woks long Vanimo i sindaun antap long ol autstending peimen' bilong ol narapela wok tu longpela taim tumas.

NA bung bai kamapim Lo bilong ol lida

NESENEL Alaiens Pati (NA) bai gat lo ol lida bai kam aninit long em.

NA Pati Momase Konvensen i bin tokaut long dispela insait long konvensen o bung bilong ol long Madang long dispela wik.

Ripot i kam long Opis bilong Praim Minista i tok ol bai kamapim dispela lo taim ol i sindaun long bung bilong ol long mun Epril neks yia.

Ripot i tok pati bai yusim dispela lo long makim ol kendidet bilong em long 2007 nesanel ileksen.

Deputi Pati Presiden bilong Momase Rijen John Buri na 4-pela provinsel brens presiden bilong Is Sepik, Sandaun, Madang na Morobe i bin sainim dispela resolusen na singaut long glasim ol polisi bilong pati i karamapim praivetaisesen, edukesen subsidi, ol sevis i go long ol distrik, risos developmen na ol papa bilong risos. Momase Rijen NA i bin wanbel long givim moa pawa i go long ol pipel bilong em

na rot em aninit long ol progrem we em i ken kisim ol sevis i go long ol distrik na pipel.

Long gutpela gava-nens na lidasip, Momase han bilong NA i no sapotim polisi o lo bai rausim luksave ol pipel i gat long ol lida bilong pati we ol pipel yet i putim ol long posisen long makim ol.

"Mipela i egensim ol sotpela taim rot we i karamapim lo bai givim tok orait long ol lida bikpela hap mani long yusim sapos dispela bai bagarapim ol rot bilong kisim semis i go long ol pipel na daunim wok bilong ol lida olsem ol lo meka.

"Long givim moa pawa i go long ol distrik long kisim sevis na lukim olsem em i go gut, ol i mas glasim sistem bilong gavman na painim sistem i gutpela moa long etresem ol salens kantri i gat bilong inapim driman bilong em long kamapim gutpela kantri," opis bilong Praim Minista i tok.

Momase NA sapotim tingting long rausim rijinel sia

TUPELA Rijinel memba i sapotim ol toktok long rausim ol rijinel sit na kirapim moa open sit.

Praim Minista na Gren Sief Sir Michael Somare na Inta Gavman Rilesens Minista Sir Peter Barter i bin autim dispela insait long NA Pati rijinel bung long Madang i bin kamap long wiken.

Rausim ol rijinel sit i bin wanpela long ol planti ajenda bung i bin wanbel long rausim bihain long 2007 nesanel eleksen.

Sir Michael i bin tokim bung olsem ol bin kirapim ol rijinel sit bipo long independens bilong strongim ol pipel long makim moa PNG pipel i go long Palamen tasol planti yia i go pinis nau na na sit inapim as tingting ol bin kirapim long em. Na em i taim long rausim rijinel sit bilong opim rot long moa open ilektoret.

Praim Minista i tok bilong mekim dispela i wok, ol rijinel memba long ol narapela rijen i mas sapotim.

Inta-Gavman Rilesens Minista Sir Peter Barter i sapotim Praim Minista na tok ol i mas putim stretpela rot long skelim ol samting bilong lukim olsem ol provins i sot long ol memba taim ol i rausim ol rijinel sit. Planti memba bilong Palamen bilong Momase Rijen na ol bikman olsem Sir Barry Holloway na olpela Sief Jastis Sir Arnold Amet i bin kamap long bung ya.

Momase NA Brens i bin strongim tingting long rausim ol provinsel ilektoret na sanapim moa open ilektoret inap long 2007.



PUBLIC NOTICE

**ENBP EASIPAY
INSTALLATION SCHEDULE**

INSTALLATION DATES	LOCATIONS
Monday 24/10/05 to Friday 2/12/05	Kabaira, Boava, Lungaluna, Livuan, Vunagamata, Ratongor, Raval, Vunatat, Putunagororoi, Vunalir, Kabakada, Vunairoto
Monday 24/10/05 to Friday 2/12/05	Vunavutung, Kurakakaul, Ratung, Pilapila
Monday 24/10/05 to Friday 2/12/05	Nonga base hospital, Taviu No 1 (Subbase)
Monday 24/10/05 to Friday 2/12/05	Volavolo, Toleap, Topukpuk, Haus Guria
Monday 24/10/05 to Friday 2/12/05	Whole Rabaul Town
Monday 24/10/05 to Friday 2/12/05	Malaguna no 1, 2, 3 & CPL

Schedules for other areas will be published as the installation progresses.

Issued by
PNG Power Public Relations

Ol yut i laikim helpim

Natasha Bodger i raitim

OL YUT insait long Maunten Hagen siti long Westen Hailans i kamapim tingting long wok bung na klinim eria insait long taun bilong ol.

Taun Kaunsil bilong Maunten Hagen i amamas na tok olsem dispela ol yangpela man save wokim stil pasin na bagarapim ol pipel bilong taun eria bipo.

Planti long dispela manki save stap long setelmen na i no save go skul o wok. Ol papamama i no wok mani olsem na ol yangpela manki i save wokim of stil pasin na kilim man.

Tasol nau ol i lusim dispela pasin na ol i wokim gutpela wok na helpim ol Volantia Kraim Stopas (VCS) long lukautim komyuniti bilong ol.

Ol kaunsel lain i tok olsem dispela wok we ol yut i wokim, em long helpim ol long stretim rot bai ol i ken kamapim gutpela sindaun bilong olgeta insait long taun long bihain taim.

Presiden Michael Tambai i tok ol wok lain insait long kaunsel i laik wokim bai ol yut i yusim het na lukautim ol pipel insait lo komkyuniti bilong promotim gutpela sindaun namel long ol manmeri bilong komyuniti. Em i tok nau ol pipel bilong Maunten Hagen taun inap raun gut na amamas insait long wan wan komyuniti bilong ol.

Na em i askim ol pipel na wan wan komyuniti long helpim ol yut long wok bilong ol na daunim ol raskol pasin.

"Mi laik strongim ol yangpela bilong yumi long kamapim gutpela ples na stretim sindaun bilong ol pipel insait long Hagen siti.

Nau yet, dispela ol yangpela man i wok long planim plaua na klinim ol wan wan hap tasol wok bilong ol bai i no nap stret sapos helpim i no kam long ol bisnis manmeri na ol manmeri bilong pablik.

Bilimoia papa graun kisim skul long lukautim bus, wara na graun

James Kila i raitim

MOA LONG tripela ten ol papagraun bilong Bilimoia insait long Kainantu distrik long Isten Hailans provins na sampela long hap bilong Gusap long Madang i bin bung long Aiyura long wangepela woksop o trening long lukautim bus, wara na graun bilong ol.

Dispela trening woksop em Hailans Kainantu Limitet i mekim kamap em long givim gutpela luksave i go long ol lain papagraun long gutpela rot ol yet i mas save long en long sait bilong lukautim envairomen.

Dispela ol risos olsem bus, wara na graun i mas bungim bungim bagarap taim developmen i kamap.

Siaman bilong Isten Hailans

Netserel Risoses Orike Bao i bin stap long dispela seremoni na i givim bikpela tok amamas bilong em i go long Hailans Kainantu Limitet long kamapim dispela trening long gutpela bilong ol papagraun.

"Dispela em nambawan taim tru long save bilong mi em mi lukim olsem dispela kain kos o trening i kamap na mi amamas olsem ol lain papagraun bilong bilimoia, we i go inap long Madang (Gusap), Agarabi na Kafe lain i kam bung na kisim save long lukautim bus na graun bilong yupela," Mista Bao i tok.

"Dispela trening kampani i givim yupela em bikpela samting tru long bihain taim bilong yupela na ol pikinini bilong yupela," em i tok.

Mista Bao i tokim ol papagraun long wok bung wantaim kampani Hailans Kainantu Limitet na gutpela wok developmen bai kamap.



SKULIM PASIFIK: DISPELA yangpela manki Asaro i bin soim stail bilong ol graun man bilong ples bilong em long wangepela bung bilong ol bikmanmeri bilong turisim long Pasifik. Bikpela kibung bilong ol turisim wokmanmeri insait long Pasifik i bin kamap long Mosbi siti long dispela wik. Dispela yangpela wantaim ol arapela yangpela i makim wan wan rijen bilong kantri i bin stap long soim stail bilong ol na skulim ol wansolwara long kalsa bilong yumi. *Foto: Neville Choi*

Dai bilong man Tairora klostu kirapim birua long Aiyura

DAI bilong wangepela man bilong Tairora insait long Aiyura Veli long Isten Hailans provins i kamapim kros na hevi namel long tupela lain.

Dispela hevi klostu tru i kamapim wangepela bikpela pait, we planti samting na laip tu i ken lus.

Dispela man Tairora, ripot i tokaut olsem em i bin dai bihain long sampela lain man bilong Asaranka, klostu long Aiyura stesin i bin paitim em nogut tru.

Dispela man i bin kisim

bagarap long bodi bilong em bihain long ol i paitim em bihain long ol i paitim em na taim ol i karim em i go long bikpela haus sik long Goroka em i lusim planti blut na ol bagarap em i kisim i mekim na em i dai.

Wangepela wites o man i lukim dispela hevi i tokim Wantok Niuspepa olsem dispela birua i bin kamap taim dispela yangpela man Tairora i bin harim olsem anpela kandere meri bilong em husat i stap long ples Asaranka i

bin dai na em i bin bringim sore i go. Tasol taim em i go long Asaranka em i bin karim wangepela bus naip na traim long katim ol man long rot. Ol dispela lain i lukim olsem na ol i belhat na paitim em pundaun na turangu i kisim bikpela bagarap tru.

Ol sampela lain i lukim na karim em long ambulens i go long Goroka Haus Sik tasol turangu i bin dai long haus sik.

Ol lain wanpisin bilong dispela man Tairora i harim dai bilong Wantok

bilong ol na ol i karim bunara spia na gan na laik go pait wantaim ol lain Asaranka.

Tasol polis bilong Obura-Wonenara i bin stap na daunim dispela hevi.

Tupela sait wantaim i wok long tok pait agensim ol yet, bikos ol lain Tairora i sasim kompensesen long ol lain Asaranka.

Nau yet birua i slek i go daun, tasol planti pipel long Aiyura Veli i poret nogut ol biua bai kirapim pait gen.

HINO 700 series

NEW STOCK ARRIVING

From K9,600*

Monthly Payments over 48 months plus GST. (To Approved Purchasers)

* Subject to Bank/Finance Company Approval.

HEAVY DUTY DUMP

Hino FS 6 x 4, 16 Ton Dump Truck, Factory Fitted Body.

For More Information Contact:
3229400
JIM MAXWELL - Port Moresby
Offer Expires : 30 / 09 / 2005 or While Stocks Last!

Ela Motors TRUCKS
KING OF THE ROAD

EM9018

WE PROVIDE : TOTAL SALES • PARTS & SERVICE BACKUP • FINANCE • LEASE PACKAGES • 15 BRANCHES NATIONWIDE



BIKPELA DE: Mama Ancilla N'Drewei i amamas long pikinini Nadia na pren bilong em Quinet i kisim namba wan komyunio long Sen Peter Sanel Peris Erima insait long Nesenel Kapitel las wik Sande.

NCDC Siaman i no amamas long stil pasin

Stephanie Waide i raitim

SIAMAN bilong NCDC, Sir Mekere Morauta i tok aut egensim pasin bilong brukim haus na go insait na stil.

Em i wokim dispela toktok bihain long ol stil man i brukim opis na stil-im ol samting long

Siti Hal long Fonde moning.

Ol ripot i tok long Fonde moning, ol stil man wantaim gan i holim ol sekuriti bilong Siti Hal, brukim opis na stilim ol sampela kompyuta, printa, wan pela feks masin na ol TV.

Ol bin brukim opis bilong Sir Mekere, Siti Menesa Peter Loko na

Asembli Sevis Divisen long top plua bilong Siti Hol.

Siaman Sir Mekere i autim bel hevi bilong em na tok olsem em i no amamas olsem dispela pasin i kamap long Siti Hal.

Em i tok polis i mekim wok painim aut long painim ol dispela stil man.

Em i bilip olsem bai ol i painin husat i wokim dispela pasin.

Em i bilip tu olsem taim ol i painimaut, bai ol i ken kisim bek ol samting i lus.

Sir Mekere i tok em i sori long lukim ol kain pasin i kamap long ol pablik propeti.

Em i tok ol kain pasin bilong bagarapim pablik propeti i no gut-pela. Em i tok yumi mas noken larim kain pasin i kamap moa.

Long Fride, polis i painim wanpela feks masin na 3-pela kompyuta.

Ol no painim aut mani mak bilong ol samting i lus tasol polis i wok long karim wok painim aut yet.

Ol polis tu i tok olsem ol i no klia long wanem as na dispela stil pasin i kamap.

Sia man bilong siti hal na ol polis man we i mekim wok painim aut i askim pablik long helpim long wok painim aut bilong ol sapos ol i gat sampela infomesen.

Kerema bai gat taun plen

GALP Provinsel Gavman i givim K40,000 long kamapim ol gut-pela plen bilong Kerema taun.

Provinsel gavman long las wik i bin givim dispela mani i go long Eben Lokol Level Gavman Seketeriet bilong kamapim ol plen bilong Kerema taun. Eksekutiv Dairekta bilong

Seketeriet Warkia Kaminiel i tok taim ol i wokim gutpela plen bilong Kerema taun, ol i ken kisim gut sevis i go long moa long 8,000 pipel i stap long Kerema taun.

Bosman bitong Kerema Taun, Meya Vail Ori i tok Kerema i nogat gutpela developmen i kamap long

planti yia na provinsel gavman i gat bikpela wok long lukim olsem i mas gat gutpela taun plen bilong Kerema.

Em i tok stat yet long taim Australia i lukautim PNG, Kerema i no bin gat gutpela taun plen.

Em i gutpela gavman na taun atoriti i kirap wantaim kain tingting.

Resis long sapatim skul na HIV/AIDS pait

WANPELA Gret 6 sumatin long Oro provins i sanap long resis bilong helpim pait egensim AIDS na long wankain taim tu, kamapim mani bilong helpim skul bilong em.

Philomina Jean Misirait husat i gat 12-pela krismas i sanap long resis olsem Mis Oro. Provinsel AIDS Komiti (OPAC) na Provinsel AIDS Kaunsel yet bilong Oro i sponsaim em. Em i sanap long resis wantaim Mis Papindo, Mis Madang, Mis Tufi na ol arapela moa.

Kodineta bilong Oro Provinsel AIDS Komiti, Benson McRubbins i tok OPAC i sponsaim Philomina bilong kamap Mis OPAC long sapatim Popondeta Praimeri skul i painim mani long sanapim nupela klasrum na ol kompyuta, feks na printa skul yet.


Antap long dispela, Mista McRubbins i tok sponsaim ol sumatin na yangpela pikinini na ol sumatin bai strongim tingting na tuk-save bilong ol yangpela long dispela

sik nogut we i wok long bagarapim planti bilong ol na ol arapela pipel long dispela kantri.

Moa long 100 pipel i bin stap insait long lons bilong dispela resis. Ol bin kamapim moa long K3,000 long taim bilong lons.

Mista McRubbins i bin tokim ol pipel i bin stap long lons olsem sik AIDS i kam pinis tu long Oro provins na long olgeta wik, ol i painim olsem tupela pipel i gat binatang bilong AIDS.

Katim long hia



Fri Buk Baibel bilong ol pikinini

Nem:

Adres:

Yu laikim wanem kain Buk Baibel? (makim wanpela bokis)

Tok Pisin

Tok Inglis

Askim Namba 1: Raitim nem bilong kantri Praim Minista Sir Michael Somare i bin go na toktok long ol niusmanmeri bilong ol long dispela wik?

Ples bilong raitim bekim o ansa bilong ol askim:

Bekim Namba 1:

Bekim Namba 2:

Bekim Namba 3:

Bekim Namba 4:

KATIM PIKSA RESIS

Katim piksa, bungim wantaim na kisim **WANPELA FRI BUK BAIBEL** bilong ol pikinini.

I no hat wok tumas. Stat long dispela wik na i go inap tripela wik antap, bai i gat wanpela hap bilong piksa we yu mas katim na bungim wantaim. Taim yu katim pinis, yu mas givim bekim long wanpela askim i stap insait long Wantok Niuspepa yet. Raitim ansa o bekim bilong dispela askim long ples bilong raitim daun bilo na salim i kam long:

WANTOK NIUSPEPA
KATIM PIKSA RESIS
P. O. Box 1982
BOROKO
NCD

Taim yu salim olgeta 4-pela hap bilong dispela piksa i kam long Wantok Niuspepa, mipela bai salim wanpela Buk Baibel bilong ol Ptkinini i go long yu.

Raun Lukim ol Meri na Pikinini



CIMC: Barbara Tori na lain bilong em i wok wantaim Famili na Seksuel Vailens Eksen Komiti (FSVAC) long helpim ol meri i kisim birua long vailens o man i paitim ol reip na ol mama na pikinini i bungim famili hevi, i bin stap tu long lons.



UNDP NA UPNG: Tupela meri lida, Margaret Loko bilong Yunaitet Nesens Developmen Program em i wok long HIV/AIDS Jenda Program na Margaret Obi i wok wantaim Yunivesiti ov PNG i save sapatim strong wok, raits na developmen bilong ol meri.



YWCA: Priscilla Kare (namel) em lidameri husat i save toktok strong sapatim wok na developmen bilong ol meri. Wantaim em, em tupela YWCA wokmeri.

Ol Piksa bilong Wol Populesen Lonsing long Crowne Plaza.



LOTU BUNG: Ol Luteran Sios meri insait long sios konferens bilong ol.

Lo bilong lukautim ol meri na pikinini



Skrui Tok long Mentenens

SAPOS yu laik kisim Kastodi oda tasol man bilong yu i save givim inap mani long ol pikinini, yu mas aplai long Nesenel Kot tasol bai yu mas hairim wanpela loya long dispela.

Husat i ken kisim kastodi bilong pikinini?

Lo i tok mama na papa i gat wankain rait long ol pikinini bilong tupela. Sapos yu askim mejistret long mekim Kastodi Oda, majistret bai skelim na tokaut olsem ol pikinini i mas stap wantaim yu o papa bilong ol.

Moa long neks wik

Sotpela tok Lukaut

Skrui Tok long HIV/AIDS

OL neiba i ken helpim famili i gat HIV/AIDS hevi. Grup bilong ol meri, ol yut na ol sios i ken bung wantaim long helpim. Ol politisen na sosel ogenaisesen i ken givm wankain helpim tu.

Kain helpim we ol neiba i ken mekim em long kisim wara bilong famili, go long maket, kukim kaikai, lukautim ol pikinini, helpim long gaden na wasim ol klos.

Bikpela samting em stap na toktok na lukim famili. Sapos yumi lukluk long ol, ol bai pilim olsem ol i hap long komyuniti. Em i gutpela sapos komyuniti i pilim fri long toktok long HIV/AIDS, olsem tasol ol i toktok long ol narapela sik. Olsem na husat lain i laik wokim ol kain toktok bai pilim olsem ol i no wokim gutpela pasin na nogat manmeri i laik harim ol.

Tingim, "Tude em mi na tumora em i ken narapela", olsem hap tok we wanpela man Afrika husat i wanpela musikman tasol em bin dai long sik AIDS i tok.



Kuk Kona wantaim MERI WANTOK

Savoury Chops

- Yu mas i gat:
- 1-pela 500 grams peket lem sop o lem fokwata
- 2-pela tebolspun tredisenel Greivoks
- 1-pela tebolspun Faunten Soy wantaim galik
- 1-pela anien
- 1-pela tomato yu katkatim
- 1-pela tebolspun kawawar yu greitim
- 1-pela tispun oil
- 1-pela kap wara

We long Kukim:

- 1- Praim o babakwuim
- 2- Praim kawawar inap em i go braun.
- 3- Putim i go insait anien na tomato.
- 4- Miksim tredisenes grei voks wantaim wara na faunten soi sos na galik na kapsaitim i go long praipan.
- 5- Kapsaitim i go antap long lem sops na sevrim.

Wik bilong noken bagarapim meri

DISPELA em wik bilong luksave long nogat vailens long ol meri na pikinini.

Yang Wimens Kristen Asosiesen (YWCA) i gat ol wok plen long dispela wik bilong luksave long "Week Without Violence".

Ol wok program i bin stat long dispela wik Mande Oktoba 17 na i pinis long dispela Sande Oktoba 23.

Het tok em 'Helt long olgeta Meri'.

Long wankain taim tu, ripot bilong Wol Populesen Fan bilong Wol Helt Ogenaisesen (UNFPA) long mak bilong manmeri long wol i tok HIV/AIDS i no inap go daun na ikonomi bilong ol kantri na wol wantaim ol wok go het bai i no inap kamap gut sapos wol na ol kantri i no strongim ikwaliti o wankain mak namel long man na meri na daunim pasin bilong paitim ol meri.

Insait long PNG, tupela o tripela meri i save dai olgeta de na mak long 18 pesen yangpela meri i karim bel we ol i no plening long em. Na 2 pesen mak long ol mama i gat bel i go long klinik i gat binatang bilong AIDS. "Dispela em ol ripot i no gutpela na i kamap bikos long ol senis insait long komyuniti.

Planti tok promis tumas i go pinis long ol meri long PNG na helt bilong ol meri i wanpela bikpela hevi na wari long kantri. Insait tupela ten krismas i go



WARI LONG OL YANGPELA : Ripot wari long ol yangpela na i laikim moa sapat na risos long helpim ol.

pinis, helt bilong ol meri i no kamap gut.

Taim mi bin stap sumatin 20 krismas i go pinis, kantri i bin save gat wanpela o tupela ripot bilong reip insait long 6-pela mun tasol tude, 2 o 3-pela ripot long dispela i kamap long wanwan de." Profesa Mathias Sapuri em hetman bilong Marasin skul long Yunivesiti bilong PNG i tok.

Em i tok kantri i mas wokim samting long daunim dispela na putim helt na stap bilong ol meri i stap antap long lista bilong em.

Man i makim UNFPA long PNG Duah Owusu-Sarfo i tok sapos ol lida i sapatim ol wok long ikwaliti, daunim vailens na helt i no gutpela long laip bilong ol meri, bai ol wok mani na developmen gro i kamap

gut na dispela tu bai daunim kalap long binatang bilong HIV/AIDS insait long 10-pela yia i kam.

Em i tok long 40 milien pipei long wol i gat binatang bilong AIDS na hap long ol em ol meri. Na ol dispela i no inap go daun inap pasin bilong wokim nogut, papaitim ol meri na lukim ol meri olsem samting nating i pinis.

Bikos PNG i gat mak nogut long paitim na kamapim hevi o vailens agensim ol meri, Mista Owusu-Sarfo i tok kantri i wok long tromoim bikpela mani long ol hevi i sut long dispela bikos dispela i min olsem meri i kisim hevi i mas go long haus sik na kisim marasin. Na helt Dipatmen i mas tromoim moa mani long baim ol marasin, wankain long ol kot, na skul na ol wok kamap we i lus bikos ol meri i kisim hevi.

Mista Owusu-Sarfo i tok em i moabeta long kantri i gat kempein long pinisim vailens agensim ol meri na tu, larim moa pikinini meri i go long skul bikos taim yu skulim meri, yu skulim kantri.

Wol ripot long Populesen i tok wol i save tromoim wan trilien dola long militeri o pait, skelim wantaim \$69 bilien long developmen eit.

"Bihain dispela we mak bilong mani i go long militeri wok i bikpela moa long ol arapela bikpela eria, em i klia olsem inapim millenium developmen gol i samting bilong ol politisen i strongim tingting (political will) na i no sot long mani. Tingim ol bikpela samting we bai kamapim, kos long mak bilong \$135 bilien long 2006 na i go antap long \$195 long yia 2015, dispela manimak em inap.

Taim long mekim wok em nau tasol.

STORI TASOL



wantaim

FR. PAUL LIWUN, SVD

Laik em bikpela samting

DISPELA stori i bin kamap long wanpela liklik ailan. I gat sampela lain, nem bilong ol em Love, (Laik pasin), Richness (i gat planti samting), happiness (Amamas), sadness (wari) na planti narapela samting moa i stap amamas wantaim.

Tasol long wanpela de, i gat hevi i kamap. Storm (bikpela ren na win) i kamap na wantu tasol sol wara i kamap antap tru na laik karamapim ailan. Olgeta i hariap tru long painim rot long lukautim ol yet.

LAIK; em i guria tru bikos em i no inap swim, na moa yet em i nogat kanu long helpim em i lusim ailan. Em i sanap tasol arere long nambis na singautim ol narapela long helpim em. Tasol solwara i kamap antap na antap moa.

I no long taim LAIK i lukim RICHNESS i pulim kanu bilong i kam. Taim em i lukim RICHNESS i kamap, LAIK i singaut strong: "Richness, Richness... helpim mi".

RICHNESS i harim singaut bilong LAIK, tasol em i tokim LAIK olsem: "Sori tumas...kanu bilong mi i pulap pinis wantaim olgeta samting bilong mi. I nogat spes i stap. Mi no inap kisim yu. Nogut kanu bilong mi i hevi tumas na kapsait". Pinihim tok bilong em, hariap tasol RICHNESS i pulim kanu bilong em strong moa na go, lusim LAIK i sanap long nambis.

LAIK i sanap sori stret long nambis. Em i lukim AMAMAS i kamap long nambis wantaim kanu bilong en. LAIK i singaut strong: "AMAMAS... AMAMAS...helpim mi". Tasol AMAMAS i pulap long amamas tru olsem na em i no inap harim singaut bilong LAIK.

Nau solwara i kamap antap moa inap long bel bilong LAIK pinis. LAIK i kamap wari moa moa yet, i no longpela taim, BEAUTY (SMAT) i pulim naispela kanu bilong em kamap long nambis we LAIK i sanap long en. Taim LAIK i lukim SMAT i kamap, em i singaut askim helpim. "SMAT, karim mi go wantaim yu".

Tasol SMAT i bekim - Sori LAIK, yu wet na doti tumas. Mi no inap kisim yu. Nogut yu mekim kanu bilong mi bai doti. Mobeta yu wetim narapela lain. Mi no inap helpim yu".

Taim LAIK i harim dispela tok, em i bel hevi tru. Em i stat long krai... na krai moa moa yet. Taim LAIK i krai i stap, SADNESS i pulim kanu bilong em i kamap long ples we LAIK i sanap long en. LAIK i singautim em long helpim; "Oh, SADNESS, kisim mi go wantaim yu". Tasol bekim em i kisim em i olsem: "Sori LAIK, bel bilong mi i no amamas olsem na mi laik stap wanpis. Mi no laik narapela man o meri stap wantaim mi". Na em i pulim kanu na go olgeta.

LAIK i givap pinis. Em i lukim wara i kamap antap moa yet na pasim maus bilong em pinis. Em bai indai nau insait long sol wara. Tasol taim em i krai na wari i stap, em i bin harim wanpela nek i singautim nem bilong en. "LAIK, kam hariap na kalap long kanu bilong mi". LAIK i tanim na lukim wanpela lapun man wantaim kanu bilong en. Hariap tru LAIK i kalap long kanu na go wantaim dispela lapun long narapela ailan i stap klostu.

Taim lapun i lusim LAIK long dispela ailan, hariap tru em i lusim LAIK na go. Long dispela taim LAIK i luksave olsem em i no save long lapun husat i bin helpim em. LAIK i bin askim ol narapela manmeri, husat lapun man i bin sevim laip bilong en.

Ol as ples i bin tokim em olsem, "Lapun i bin sevim laip bilong yu em i TAIM". Bilong wanem em i sevim laip bilong mi? Mi no save long en. Olgeta pren bilong mi, i no helpim mi.

Ol man bilong ailan i tokim LAIK: "Bikos TAIM tasol i save gut hamas trupela veliu bilong LAIK".

Ol marit pater i gat wok long sios

....Katolik Sios i mas lukluk long en

Stori i kam long Katolik Nius sevis

SOT long ol pater long sampela hap bilong wol i kamapim wari na askim Katolik Sios long lukluk long ol marit pater na kisim ol wok.


Dispela wari i kamap insait long bung bilong ol Katolik Bisop long Rom we ol i toktok long Yukaris na ol arapela samting i sut long sios na ol pipel bilong em.

Bung i lukim olsem ol sios i mas luksave long sot long pater hevi bilong go pas long selebresen bilong Yukaris long givim spiritual strong long ol pipel na tu, lukluk long wok bilong ol marit pater long sios.

Koatjuta Bisop bilong Wabag daiosis long Enga provins, Bisop Arnold Orowae i bin tokim bung olsem ol Katolik manmeri husat i stap long ol ples i longwe i nogat sans long selebretim Misa lotu na kisim Yukaris.

Bisop Arnold i makim PNG long bung bilong ol Katolik Bisop bilong wol long Rom.

Em i tok "i moabeta long sios i lukluk long wanem kain pater" ol i laikim long kain situesen o stap bilong ol na em i askim sios long tingting



Bisop Arnold Orowae

gen na larim odinesen bilong ol "mature man" o ol man husat i gat strongpela bilip, bikpela tingting long wok na i gat luksave long ol pipel na komyuniti. Planti taim, ol dispela kain man em ol bikpela man na ol i marit man."

Em i tok bai em i isi long trenim ol dispela man long givim Yukaris.

Ol arapela bisop long wol tu i bin autim sot long ol pater hevi, moa yet, long ol kantri na komyuniti insait long ol tet wol kantri.

Sampela i bin tok long stretim dispela hevi, i moa gutpela long tilim gut ol pater long

olgeta hap bilong wol na tu, serim ol pater.

Sampela bisop i bin toktok long larim ol marit pater i kari-maut dispela wok na

i bin gat tu ol toktok long gutpela na nogut sait bilong ol.

"Long larim ol marit pater i mekim wok long sios, bai i gat hevi yet i kamap," Kadinel Nasrallah P Sfeir bilong Lebanon i tok.

Marinait Sios em Isten Katolik Sios i gat ol marit pater we Kadinel Nasrallah i wok long en.

Em i tok marit pater i mas lukautim pastaim famili bilong em na long salt bilong edukesen na ol arapela samting moa.

Em i tok em i hat tu long taim bilong salim pater i go long narapela ples bikos famili bilong em tu i mas go wantaim.

Tasol em i tok ol marit pater i skruim bilip na serim wantaim ol narapela, long gutpela na hatpela taim.

Bisop Arnold i bin askim tu sapos ol pater husat i wok namel long ol trangu i no save long rit na rait long ol bus ples i mas kisim planti yia long skul

tioloji. Em bin tok strong olsem ol minista bai i gat gutpela trening na skul tasol long wok bilong selebretim yukaris.

"Sios i mas mekim klia posisen bilong em long Yukaris," em i tok.

"Sampela i pilim olsem Yukaris em i kaikai bilong ol hangere lain

na i no pei long manmeri i wokim gutpela samting," em i tok.

Em i tok i gat wari olsem yumi mas lukim Yukaris olsem selebresen long ol presen na gutpela samting God i givim long yumi na i no bilong ol sampela lain tasol.

Bisop Denis Browne bilong Hamilton, Nu Silan husat i Presiden bilong Oseania Konferens bilong ol Bisop i tok sios i mas painim rot long kisim Yukaris i go long ol pipel i stap long ol longwe na bus ples tu.

Em i tokim ol Bisop i bung long tingting gut long ol askim we ol sios memba bilong ol i askim tumas long ol an wanpela em, watpo ol eks Angliken pater i save kisim odinesen na kamap

Katolik pater taim ol eks Katolik pater husat i marit i no inap long mekim pastoral wok.

Angliken yut grup bilong Oro wokim autris

Veronica Hatutasi i raitim

...Bikpela wari i stap long ol rurel yut

WANPELA famili na yut grup bilong Popondeta Angliken Daiosis long Oro provins i bin wokabaut i go long longwe hap bilong boda eria long Apa Muse bilong Ijivitari na Abau long serim spirituel lav o laik pasin na lukaut wantaim ol arapela brata susa bilong ol.

Twenti memba bilong Holi Epipani Angliken peris bilong Seva eria i bin wokabaut 25 kilomita kalapim Owen Stenli Rens o maunten i go long ples Domearu i stap long boda eria namel long Abau Distrik na Popondeta long karimaut spirituel wok na tu serim, helpim na lainim ol samting wantaim ol brata na susa bilong Abau.

Katekis Inini i bin go pas long ol dispela yut bilong ol ples olsem Ponreta, Ajaro, Boroko na Huhuru Undi long wokabaut na kalapim ol maunten bilong Owen Stenli i go olgeta long ples Domearu long karimaut autris progrem bilong ol.

Insait long wanpela mun ol i bin stap long dispela ples, ol yut i bin serim laik pasin na lukaut long pasin Kristen wantaim ol manmeri bilong Domearu.

Ol bin lainim tu kain stap na ol pasin kastom bilong ol Domearu pipel. Ol bin helpim tu ol ples lain long ol wok gaden na ol arapela komyuniti na sios wok we ol Domearu pipel i bain laikim helpim long

en. Long wankain taim tu, i gat wari olsem nogat helpim tumas i wok long go long ol yut insait long ol rurel eria olsem ol dispela long ol taun na siti.

"Olsem wanem long ol yut bilong ol ples longwe long ol rurel eria? Ol i bilong PNG tu o nogat?"

"Planti mani helpim, promosen na developmen i go long ol savelain i stap long ol taun na siti. Na tu, long ol dispela long ol rurel eria husat i gat save long toktok long gawman, ol NGO na dona oge-naisesen. Na olsem wanem long ol brata susa yut i stap long ol rurel eria bilong kantri?"

"Sapos ol dispela yut bilong rurel eria i ken go aut long sea na helpim ol brata na susa bilong ol long ples longwe, ol toktok i stap long singsing "PNG yumi mas kamap wanpela nesen na kantri"i ken karim kaikai," mausman bilong yut grup, Bruno Boda Pao i tok.

Bruno i tok ol yut lida bilong Musa peris long Popondeta Angliken Daiosis bai bung wantaim ol yut lida bilong Katolik na Angliken bilong Nesene! Kapitel Distrik insait long wanpela woksop long dispela mun.

Lidasip woksop bai kamap long Sivarai Namona konferens senta long Bomana ausait tasol long Mosbi siti.

Tripela de woksop bai stat long Sande Oktoba 30 na pinis long Trinde Novemba 2.

Ol Lutheran kisim tok long wok evanjelais

Paulus Tali i raitim

"OL KRISTEN I STAP OLSEM OL SOLDIA"

Sapos yupela i laik sanap strong, orait yupela i mas pasim tok tru olsem let bilong yupela na pasim stretpela pasin olsem siof kappa i karamapim bros bilong yupela, na yupela i mas redi long autim gutnius bilong God i laik wanbel wantaim ol manmeri, na putim dispela pasin olsem su bilong yupela. Yupela i mas kisim dispela olgeta samting bilong pait, na yupela i mas kisim tu pasin bilong bilip, na holim strong olsem hap plang, bai yupela inap long mekim i dai olgeta spia paia dispela man nogut Satan i save sutim i kam long yupela. Yupela i mas tingting God i kisim bek yupela pinis, na dispela tingting i mas i stap olsem hat kapa yupela i putim. Na yupela i mas holim bainat bilong Holi Spirit, em tok bilong God. EFESUS 6: 14-17

WOK Iwanjelais em i bilong yumi olgeta, mini konferens bilong Lutheran Sios Papua Distrik i bin kamap long Maun Zion kongrikesen long 9 Mail ausait long Mosbi i bin kisim dispela toktok.

Ol Lutheran Kristen i bin kam olsem long Laloki, Sogeri, Bomana, 14 Mail na Kep Rodney long stap insait long dispela wanpela wik bung.

Bikpela toktok i bin kamap long wok Evanjelisim..

Pasto bilong kongrigsen Joba Moyope i bin tok nau planti ol Kristen manmeri i no karimaut wok Iwanjelaisim.

Na em i tok yumi noken ting tasol ol pasto, ol het man bilong sios, ol yut lida, ol Sande skul tisa bai karimaut


dispela wok, nogat. Em i wok long yumi olgeta. Yu lida Bayang Gesyung i tok moa olsem mini konferens i bilong bungim ol arapela Kristen long save moa long tok bilong Bikpela.

60-pela deleget i bin kamap long dispela bung na moa long 250 kristen i bin stap long sapotim ol brata susa bilong ol long wanpela wik bung.

Distrik Presiden bilong Lutheran Sios Papua Distrik Bisop Somi Setu i bin tok insait long wan wan hap yumi stap long en na wanem wok yumi mekim, yumi gat wok long mekim evanjelais.

Na yumi noken tingim wok mani tasol.


Long pinis bilong konferens, ol Yabim grup long Mt Zion i bin wokim singsing na danis long tumbuna pasin na givim konferens i go long Kabwum grup long Kep Rodney eria.



NAMBA WAN KOMYUNIO: Tripela sumatin meri bilong Sen Peter Sanel Praimeri skul long Erima i redi long kisim namba wan komyunio bilong ol las wik Sande. *Poto: Veronica Hatutasi*

GLASIM TOK

wantaim



BISOP PETER FOX

Nupela Angliken Bisop bilong Popondeta

LONG Oktoba 10, Angliken Sios long PNG i bin makim Pater Joe Kopapa long kamap nupela bisop bilong Popondeta Angliken Daiosis insait long Oro provins.

Em bai laikim preia bilong yumi long givim em stia long nupela wok bilong em.

Wok bilong em i no isi.

Wok bilong em i no isi. Bisop em i lida na wokman bilong pipel bilong em. Em i mas soim gutpela pasin long ol samting em i wokim.

Em i mas harim tok bilong ol bikman bilong kleji long em tasol em i mas harim tok bilong sios em i wok long em. I no em wanpela i save wokim ol disisen, tasol ol brata bisop

i stap wantaim em we bai serim ol wari na hevi bilong em. Em i ken askim helpim long save bilong sios we i winim 2,000 krismas pinis. Em i gat preia laip bilong em long mekim em i stap klostu long Jisas.

Em i gat Baibel bilong em long givim em kliapela stia taim em i ritim dispela gut na em i beten long en.

Em i gat yu na mi long pre long em.

Wanem ol gif bisop i mas gat long karimaut wok bilong em? Ol kain man i karim ol kain presen i go long em. Nogat tupela i wankain. Bikos Papa God i singautim Pater Joe long kamap bisop bilong Popondeta, em bai gat ol gis we daiosis bilong em i laikim tasol tripela gif i bikpela moa long olgeta bisop.

Pataim, bisop i mas gat yau long harim wantaim luksave ol samting we pipel i toktok long en. Em bai harim long luksave long wanem samting tru ol i laikim long em i go long lewa bilong em. Em bai harim sapos ol samting ol toktok long ol o askim long em em ol tok tru o nogat.

Namba tu, bisop i laikim ai bilong lukim samting we Santu Spiritu i laikim em long lukim. Em bai lukim trupela situesen o stap long nau, lainim lessen long ol samting i bin kamap long pastaim na lukim rot bilong em i go fowet long bihain taim.

Namba tri, bisop i mas gat strong long tokaut, i no long tingting bilong em tasol long tingting bilong Kraisi. Em bai toktok, i no bilong em, tasol bilong sios.

Olgeta dispela samting em i mas wokim wantaim stia bilong daun pasin na bihainim singaut long lewa bilong em.

Maski yu Angliken Sios memba o nogat, plis, wokim wanpela plis, pre bilong helpim Pater Joe na Popondeta.

Ol sios agensim tupela lo senis

PAPUA Niugini Kaunsel bilong ol Sios i bin holim wanpela bung long Yunaitet Sios het opis long Pot Mosbi we i lukim olgeta sios lida i autim toktok bilong ol long tupela Bil we Palamen i laik glasim long sindaun bilong ol long dispela mun. Wanpela em Memba bilong Lagaip-Porgera Kappa Yarka i kamapim long i no rausim lida i wokim rong na namba tu em memba bilong Nuku, Andrew Kumbakor i kamapim na dispela em long apim mak bilong Iktorel Developmen Fan ol wan wan Palamen memba i save kisim long karimaut ol developmen projek long ol provins bilong ol long K500,000 i go long K1.5 milien. Ol sios i agensim dispela tupela Bil bikos ol bai no inap kamapim wanpela gutpela samting, tasol moa korapsen, pulumapim poket bilong ol na ol pipel bai karim hevi, pen na ples i bagarap.

Ol ripot wantaim Veronica Hatutasi

OL Sios insait long kantri i agensim tru bilong apim Iktorel Sapot fan bilong ol Palamen memba i go long K1.5 milien na tu, bilong noken rausim ol Palamen lida husat i asua o wokim rong.

Na ol i singaut strong long ol palamen memba long noken sapotim dispela tupela Bil taim ol i sindaun long Palamen long glasim na sketim ol long mun i kam.

Insait long wanpela bung bilong ol las wik Fraide, PNG Kaunsel bilong ol Sios (PNGCC) i bin wokim ol strongpela tok agensim tupela bil na long wanbel na sanap wantaim ol grup i pait agensim korapsen long kantri olsem Midia Kaunsel bilong PNG, Trenspensi Intenesenel na ol memba bilong Komyuniti Koalisen Agensim Korapsen (CACC) na singaut



Hetman bilong Yunaitet Sios long PNG Reveren Samson Lowa.

long ol Kristen sios long PNG na ol NGO i luksave long gutpela pasin na pablik long putim presa long ol wan wan memba bilong ol long vot agensim dispela tupela bil hia.

"Proposel o tingting bilong Nuku memba, Andrew Kumbakor long apim Iktorel Sapot Fan bilong ol memba long K500, 000 i go antap long K1.5 milien

"Proposel bilong Lagaip-Porgera memba Kappa Yarka long senisim Seksen 27 (5) (a) bilong Ogenik Lo long wok na risponsibiliti bilong ol lida long rausim pawa bilong Lidasip Traibunel long rausim wanpela palamen memba i brukim Lidasip Kod.

Siaman bilong PNGCC na hetman bilong Yunaitet Sios long PNG Reveren Samson Lowa i tok singaut

we PNGCC i wokim long agensim apim bilong Iktorel Sapot Fan bilong ol memba o stas fan i bihainim ol dispela tingting.

"I no luksave long wok bilong pablik sevis sistem i kostim kantri bikpela mani tru long ranim na dispela em rot bilong gavman bilong kisim sevis i go long ol pipel, bai isi long ol memba long gat bikpela pablik mani long han na kontrol bilong ol na ol bai yusim long laik bilong ol.

"Planti ol memba i gat rekot long paulim mani na i nogat gutpela rekot long rot ol i yusim ol mani long em.

"Bikos 2007 Nesenel Ileksen i stap klostu tasol, aninit long ol senis long Ogenik Lo ol i laik kamapim, ol memba bai gat moa mani long baim ol vot, olsem tasol ol i wokim long ol yia bipo.

"Bai daunim strong na wok bilong ol Lokol Level Gavman na kamapim mani politik long sistem bilong lukautim 'ol wok na pipel long dispela level gavman.

Reveren Lowa i tok tingting long senisim pawa bilong Lidasip Traibunel we i save rausim ol palamen lida husat i brukim Lidasip Kot o Lo em i:

"Opim rot long ol palamen memba long abrasim na ronawe long kamap aninit long Lidasip Kot taim ol i kisim sas long paulim mani o wokim korap pasin na dispela i rausim strong long Lidasip traibunel kot

"Kamapim long ples klia, tupela lo. Wanpela bilong ol palamen memba na narapela bilong ol arapela lida husat bai olgeta hevi i pundaun antap long ol.

PNGCC i gat ol memba sios olsem Evanjelikel Sios bilong PNG, Baptis Yunien PNG, Angliken Sios, Katolik Sios, Salvesen Ami Gutnius Sios na Yunaitet Sios.

Nogat gutpela kaikai bilong Iktorel sapot mani

JENEREL Seketeri bilong Katolik Bisops Konferens Lawrence Stephens i sutim tok bilong em long Bil bilong apim Iktorel sapot fan (ESF).

Em i tok 21 yias i go pinis taim ol bin kamapim dispela fan, ol i no glasim ol gutpela na nogat bilong dispela progrem yet. Tasol olgeta yia planti lida i paulim ol dispela mani.

"Sios i askim we ol gutpela sevis ol pipel i lukim wantaim dispela mani? We ol skul i gat ol tisa, ol heit klinik i ron gut, ol rot i go long

ol maket ples, pawa, ol bris na ples balus i kisim ol pipel long salim insait long 21 yias ESF i kirap? We stap ol kaikai na ol developmen pipel i lukim na sapotim go antap olsem Bil i laik kamapim long en?" Mista Stephens i tok.

Em i tok tru, ol disisen bilong yusim ESP em komiti yet i wokim, tasol ol Siaman bilong ol Join Distrik na Provinse Baset na Plening Komiti (JDBPC) em ol palamen memba yet ya.

Em i tok pablik judisieri rekot

long ol lida we kot i givim mekim save long ol o rausim long opis i soim piksa long rot we dispela mani i go long em.

Mista Stephens i sapotim ol tok tok bilong Reveren Lowa na tok ol sios long PNG wantaim sapot bilong ol patna na 80 pesen grasrut pipel i wok wantaim ol sios i lukim ol senis long Ogenik Lo bai putim mani long han bilong ol memba long baim sapot long 2007 nesenel ileksen, paulim wok bilong ol politisen na ol fainensel Etministreta, rausim narapela

K109 milien bilong karimaut wok etministresen bilong kantri na putim long han bilong ol politisen na daunim wok bilong pablik sevis masin.

"Ol sios i singaut long ol palamen memba long egensim tupela bil ya," Mista Stephens i tok.

Long wankain taim, ol sios i egensim tru tupela Bil ya na tok sapos bil i kisim inap sapot na gavman i go hetim, em i min olsem ol politisen i no harim krai bilong pipel.

"Tasol sapos gavman i go het

sapotim bil, em i mas putim mani long helt na edukesen semis na i no long ol autbot moto na ol kain samting we i no inap stap longpela taim," Mista Stephens i tok.

"Yumi gat bikpela tingting tu long putim PNG pastaim olsem het tok long 30 yias anivesri selebrenen i tok? Ol pipel yes tasol mi gat kwesten mak long planti politisen. PNG i gat bikpela dinau na mi kwestenim gavman long lukim trupela situesen na putim mani long eria em i mas go long em," Reveren Lowa i bin tok.

TOK LUKAUT



wantaim

DAVID EPHRAIM

Strongim sekyuriti bilong kantri

STRONG bitong kantri i save stap long wanem samting? Yu skelim, planti save tok i stap long Kalsa, yes em tru, sampela i tok em stap long ol lokal bisnis yumi gat long en. Na moa yet i tok i stap long han bilong ol kain bikpela wok goi na wei yumi gat.

Yes em luk olsem tru tasol bikpela moa em stap long strong bilong Sekyuriti yumi gat long en. Long dispela wik mi laik bringim bikpela samting stret gavman i no lukluk tumas long en i kamap ples klia.

Olgeta kantri i mas i gat strongpela Difens Fos long lukautim kantri. Long kirap bilong ol kain kain ol pasin raskol wantaim ol bikpela teroris insait long wol tude. Yumi mas tok lukaut strong long Gavman long traime strongim dispela han bitong en.

Nau yet planti ol mesin olsem balus na sip bilong Difens Fos bilong yumi em ol bilong bipo tru. Na dispela em save wokim wok bilong ol i no strong tumas. Moa long dispela ples bilong ol soldia long stap long en i nidim planti sevis olsem long rot, nupela haus na ol kain samting olsem, we i ken wokim ol i stap gut na wokim wok bilong ol stret.

Sapos gavman tingting strong long strongim ikonomi bilong kantri em mas pastaim stretim sekyuriti sevis bilong kantri pastaim.

Gavman mas baim ol nupela Nevi bot long helpim ol nevi long lukautim solwara bilong yumi. Nau yet ol dispela patrol sip yumi gat em bilong raun klostu tasol long ikonomi zon area na taim i go ausait long bik solwara na taim bikpela solwara wokim em i ken kisim bikpela bagarap. Nau yet dispela global woming o graun i kisim bikpela bagarap long ol kain kain ol kemikol o pipia marasin i wok long kam long ol bikpela fektori.

Dispela i wokim na solwara em i go narapela kain stret tude. Moabeta gavman mas baim nupela ol bikpela patrol bot bilong ol nevi long wokim wok bilong ol stret.

Tingim gut nau olsem i gat bikpela woa long ikonomi i kamap stap long wol tude yumi i no moa pait long graun, nogat. Yumi ken lukim pait bilong ikonomi, lotu na biknem bilong ol kantri.

Wokbung i bikpela samting

....PNG i bihainim Afrika



AMAMAS LONG HELPIM: Bikman bilong Global Fan Profesa Richard Feachem i senisim bilum wantaim Minista bilong Lands na Fisikel Plening olsem mak bilong luksave long bikpela helpim.

Veronica Hatutasi i raitim

HIV/AIDS hevi long PNG i bikpela samting nau em long bung wantaim na pait agensim bikpela woa. Sapos nogat, PNG i ken kamap wankain olsem kantri Afrika.

Tasol wok bung i mas stap strong namel long gavman, ol developmen patna olsem AusAID, Nu Silan, ol han bilong Yunaitet Nesens olsem UNICEF, UNFPA na UNDP, Yuropien Yunien, ol sios na ol NGO long daunim dispela pait we i ken bagarapim kantri insait long 10-pela krismas.

Eksekutiv Dairekta bilong Global Fan Profesa Richard Feachem i wokim dispela tok-tok long tupela de raun bilong

em long PNG we em i kam long lukluk long ol wok PNG i wokim long pait agensim sik HIV/AIDS na malaria.

Dispela em tupela sik we Global Fan i helpim long daunim wantaim bikpela manimak em i skelim bilong PNG.

Pait agensim HIV/AIDS na malaria insait long PNG i kisim moa sapot wantaim K166 milien long dispela wik i kam long Wol Global Fan.

Wol Global Fan em i wanpela nupela ogenaiesen ol bin kirapim 4-pela krismas i go pinis na hetkwota bilong em i stap long kantri Swisalen long Yurop. Ogenaiesen i kisim sapot long 30 kantri na em i sapotim 380 program.

Profesa Feachem i tok bikpela as long kirapim Global fan em long pait agensim na

daunim HIV/AIDS, sik Malaria na TB long wol.

Em i tok Fan i helpim ol liklik na trangu kantri long pait agensim dispela tripela sik.

"Situesen o sindaun em i go nogut tru. Na kantri i stap long krosrot o namel rot mak we em i hangamap long sait bilong maunten bikos ol i mas tingting long hariap na kisim program bilong stopim, testim na tritim o bai kantri i pundaun long dispela sik. Tingim Saut Afrika we i bin sanap long em 10-pela krismas i go pinis. Tenpela krismas i go pinis, Saut Afrika i bin stap long mak bilong AIDS hevi PNG i stap long em tude. Na insait long dispela taim, mak long AIDS i kalap i go bikpela, stat long 2 pesen na i go long 30 pesen insait long wanpela yia.

Bikpela bagarap. Na poin we dispela sik i klostu pairap long mak bilong 1 na 2 pesen pipel i kisim sik ya insait long wanpela yia. Na dispela em i wanpela pait we yumi mas pait agensim wantaim olgeta samting na rot yumi gat long en. Mi gat bilip olsem wantaim sapot bilong lidasip bilong praim minista na ol minista, ol lida bilong Sivil Sosaiti na ol sios na ol NGO, PNG bai bung wantaim long pait agensim woa na stopim bikpela bagarap i karamapim PNG long 10-pela yia i kam. Bikos sapos yupela i no pait agensim HIV/AIDS, hevi bai go bikpela moa na kilim dai planti tausen pipel long dispela kantri," Profesa Feachem i tok.

Tasol em i tok wantaim mani helpim bilong ogenaiesen bilong em, lidasip i wok long go strong, ol nupela teknoloji i stap, yumi gat ekspiriens i kam long ol arapela kantri, na yumi ken kamapim sampela senis.

Em i tok wok patna agensim dispela pait i bikpela samting bikos ol i mas go hetim ol program bilong daunim sik AIDS, aninit long planti salens.

Profesa Feachem i tok long dispela K166 milien Global Fan i givim, ol i katim K89.74 i go long HIV/AIDS na K24 milien long malaria.

Em i tok ol malaria projek aninit long fan i bin stat wanpela ten eit (18) mun i go pinis. Na namba wan hap bilong HIV/AIDS, ol i wok long givim mani bihain long olgeta tripela mun. Insait long dispela taim, Global Fan i glasim na skelim ol wok projek we em i sponsaim. Na sapos i gat sampela asua, ol bai stopim mani sapot pastaim inap ol i lukim olsem wok i go gut.

Manimak ol i givim long HIV/AIDS program bilong olgeta tripela mun em \$2.6 milien long mani bilong Amerika.

Tisa insevis bai helpim long rifom ...Papamama mas baim skul fi

Veronica Hatutasi i raitim

PLANTI senis i kamap long nupela edukesen rifom na i gutpela long ol olupela tisa long kisim insevis kos bilong helpim ol i klia gut na bihainim ol dispela nupela senis.

Helen Ofora em Het Tisa bilong Sekret Hat Praimeri skul na i wok tisa inap 34 krismas i tok.

Nesanel Kapitel Distrik i gat 1,840 tisa it is long Elementeri i go antap long Sekonderi level.

Misis Ofora i tok olsem wanpela tisa husat i winim planti krismas long wok, em i ting nupela rifom em i salens long olupela tisa husat i mas go insait long nupela senis.

"Mipela i kisim ol insevis kos long save long olupela samting i stap long nupela silabus. Insevis, we mipela yet i mas peim long ol kos, i helpim mipela long go insait long nupela rifom. Ol wok long nupela edukesen rifom i go isi na gutpela tasol wanpela



HELEN OFORA: Insevis i helpim nupela edukesen rifom. Foto: Veronica Hatutasi

hevi mi lukim long Elementeri rifom. Ol Elementeri i wok long bihainim wankain kampas o stia olsem ol bikpela sumatin," Misis Ofora i tok.

Long wankain taim, em i tok ol papamama i mas putim bikpela tingting long peim skul fi long ol pikinini bilong ol.

Em i tok sampela skul, i no kisim bikpela hap skul fi mani long ol papamama yet

na em i wok bilong ol long lukim olsem ol i peim ol dispela skul fi.

Global Fan helpim long HIV/Aids na Malaria pait

Natasha Bodger i raitim

GLOBAL Fan i givim moa long 50-milien Ameriken dola (K166 milien) long Papua New Guinea long helpim Helt Dipatmen na gavman long pait agensim sik HIV/AIDS na Malaria.

Eksekutiv Dairekta na man we i makim mas bilong Global Fan, Profesa Richard Feachem i kamap long PNG long Mande long glasim ol samting na lukim wanem rot Global Fan i ken helpim kantri long em.

Minista bilong Helt Melchior Pep na Sekretri bilong Helt Dipatman, Dokta Nicholas Mann wantaim ol narapela bikman bilong Helt Dipatmen

i bin stap long tok welkam long Profesa Feachem.

Profesa Feachem i autim bikpela amamas bilong em long kamap long PNG na long helpim long pait agensim dispela tupela bikpela sik we i wok long bagarapim kantri.

Em i tok dispela mani we Global Fund i givim bai stretim ol wok painim aut na ol narapela projek na tu dispela mani bai Helt dipatmen i skelim namel long sik malaria na HIV/Aids projek insait long kantri.

Em tok ol laik strongim pait egensim HIV/AIDS long wanem dispela sik i nogat marasin yet long stopim em long i kalap i go long ol narapela manmeri. Mista Pep i tok gavman bilong PNG i amamas long dispela helpim i

kam long Global Fan na tu long taim bilong planti hevi, dispela kain mani bai i ken helpim long ol projek Helt Dipatmen i kamapim na wokim.

Profesa Feachem long raun bilong em i bin bung wantaim ol bikman bilong Gavman long lonsim dispela agrimen namel long Global Fan na PNG.

Long dispela taim tu, Profesa na ol narapela lain insait long deligesen i sapos long go antap long Tsak Valley i stap insait long Enga Provins long bungim ol lain Wantok na poroman bilong Profesa.

Tasol em i katim sot wokabout na lusim PNG aste bikos ol i singautim em long go bek


Long hetkwota bilong Global Fan long Swisalen, long sampela bikpela wok.

Profesa Feachem yet i tok i no longpela taim em bai kam bek gen na pinisim wokabout bilong em i go long Hailans na ol arapela hap long kantri.

Profesa i bin stap wok long PNG long yia 1970 i go inap 1971 taim em i bin mekim sampela wok painim aut.

Narapela meri we i stap insait long deligesen em AusAID Ambaseda long HIV/AIDS.

AnneMarie O'Kefee, husat i bin raun wantaim Profesa na holim ol bung wantaim ol bikman bilong Helt Dipatmen, gavman na ol developmen patna olsem AusAID, na ol han bilong Yunaitet Nesens olsem UNICEF, UNFPA, UNDP, Nu Silan, Yuropien Yunien, ol Non Gavman Ogenaiesen na gavman.



Salim ol pas i kam long
WANTOK NIUSPEPA:
 P.O. Box 1982, Boroko
 N.C.D 111
 Fax: 325 2579
 Email:
 word@global.net.pg

Sios i muv insait long PNG

Dia Edita

MI LAIK toktok na givim sapot long lotu bilong ol Revival we ol i holim long Pot Mosbi Sir John Guise Indoor Stadium long Septemba 23-25. Mi lukim long Wantok Niuspepa long Oktoba 6, 2005 olsem mipela lukim ol mirakel we God i mekim orait ol sikman nay yau pas toktok gen na paralais man wokabout sik HIV/AIDS orait.

Na tu ol i tok ol i baptaisim 836 manmeri olgeta i kam long planti hap na ol i stap long Mosbi tu olsem na mi laik tok amamas long dispela sios bikos God i stap long sait bilong ol na kain samting i kamap long dispela taim. Mi no save lukim kain namba olsem ol sios i baptaisim ol manmeri olsem.

Olsem na mi putim dispela salens long ol sios olsem yumi lusim ol lotu na maski mipela kamap hetman o bisop long olgeta sios i stap long PNG yumi lusim na lotu long Revival tasol. Mi yet tu wantaim. Ol i no bin redim ol manmeri stap na ol i baptaisim ol nogat. Ol manmeri kam nating nating long strit na baptais o kisim hiling tu.

Em tingting bilong mi yet mi autim na yu husat laik sapotim o agensim mi wet tasol long kisim Wantok Niuspepa narapela raun.

**JOHN KOPAP
 MENDI
 SAUTEN HAILANS PROVINS**

Sepik Solidarity Grup i mas i gat opis long Is Sepik provins

Dia Edita

MI LAIK raitim dispela gutpela pas i go long Wantok Niuspepa na toktok long ol memba bilong palamen bilong Is Sepik, ol bisnis manmeri na jenerel pablik bilong Sepik i stap long dispela kantri long luksave nau long wanem wok Sepik Solidarity Grup em wanpela wasdok long pait wantaim korapsen o pasin paol long stilim mani bilong pablik.

Long Jun 1, long dispela wanpela komiti i bung na makim John Kriosaki olsem Siaman na em gen toktok long ol niuspepa, redio na rait long ol saveman long toktok bilong pasin korapsen.

Nau yet dispela Grup

i wari tru olsem i mas i gat opis na ol arapela liklik grup i mas rejista wantaim IPA na bai gavman i luksave long driman na ol astingting bilong dispela Enti Korapsen Grup.

Ol wok dispela grup i wokim pinis em i kamap na planti ol manmeri i stap long korapsen long Dipatment bilong Is Sepik em ol i saspensim ol pinis. Mi laik askim olgeta Sepik nau long helpim dispela grup na yu ken ring i kam long Bruce Samban (mausman long 864 8406 o John Kriosaki (siaman) long toktok long dispela.

**JOHN KRIOSAKI
 WEWAK
 IS SEPIK PROVINS**

Kukim kondom bai senis i kamap

Dia Edita

PLIS givim mi liklik spes tasol na mi laik autim tingting bilong mi. Mi save harim long redio, ritim long niuspepa na lukim manmeri save mekim ol awenes bilong HIV/AIDS planti taim tasol i nogat wanpela senis i kamap. Long wanem? Oltaim ol i save tok, 'yusim kondom taim yu laik kuap, kondom em i banis'.

Taim ol i mekim dispela tok, ol i wok long sikirapim tingting bilong ol manmeri

na yangpela long mekim moa pasin pamuk na i no stopim ol. Olsem na olgeta mun na yia namba bilong manmeri i gat sik HIV/AIDS i wok long go antap moa yet.


Olsem na mi ting olsem, gavman mas putim stop long kondom o kukim. Long wanem kondom i no 100% seif o banis long stopim ol manmeri long kisim HIV/AIDS.

Ating long dispela rot bai ol manmeri bai pore long go raun na mekim pasin

pamuk na bai ol i stap stret wantaim man o meri bilong ol yet. Na tu ol yangpela manmeri bai stap isi na lukautim bodi bilong ol yet gut.

Em tasol na yu husat manmeri i laik sapotim o agensim, plis rait tasol long Wantok Niuspepa na bai mi lukim.

**JAMES A. KENZU
 KIMBE
 WES NU BRITEN
 PROVINS**



Bulolo Open i gat memba long haus palamen o nogat?

Dia Edita

YES, mi sindaun na lukluk na harim tasol mi no save harim Memba bilong Bulolo Open i save toktok na mekim sampela pairap long Palamen Haus.

Olsem wanem em wanpela maus pas man em ol Garaina i votim em i kam long Haus Palamen o em olsem wanem.

Tu mi ting olsem em i pikinini Garaina, na em bai toktok na wokim rot bilong ol Garaina, skulim long liklik hap olpela Memba Samson Napo i statim.

Yes Memba, yu save dispela pablik opis em i no bilong wanpela man tasol, nogat em bilong olgeta manmeri na tu yu save Bulolo em i bruk i go tupela nau. Na long yia 2007, we em i no longwe tumas em bai yu sanap long we nau, Wau ilektoret o Bulolo ilektoret?

Em yu yet nau, sapos Bulolo, em dispela 45 votas bilong yu em yu win long en em ol i stap long Garaina na long dispela

eria em yu i no mekim rot i go long ol. Olsem na ol i no inap givim yu nau. Bai ol i givim long wanpela nupela man o meri. O nogut Tonny Flynn waitman bai sanap gen.

Memba planti hap long Bulolo ilektoret em yu i no wokim sampela projek olsem Mista Samson Napo em i mekim. Samson em i wokim planti rot na bris long Mumeng, Wau olsem Pitoi, Nemnem, Koviak na Buang.

Yu em i nogat tru. Bihain long 2002 ileksen ol dispela 45 votas bilong yu ya em ol i aipas na givim yu win, nau we rot i kamap pinis long Garaina? Ating em i kamap pinis na long 2007 bai yu opim dispela rot. Em tasol na yu husat sapota, i laik bekim em mi bai amamas tru long ritim.

**VICTO NELSON
 GEREHU
 NCD**

Rausim buskem long Kimbe taun

Dia Edita

MI WANPELA manki Wes Nu Briten na mi rait long go agensim Gavana Clement Nakmai long em i tok ol WNB asples noken toktok long rausim ol Waira taim em i givim aut tripela len krusa kar i go long polis.

Clement Nakmai, mi askim yu long stretim tok pisin bilong yu. Wes Nu Briten mipela i wari long lo na oda hevi we i wok long kamap bikos long sindaun nating long graun bilong gavman long baksait long Kimbe taun.

Dispela tripela len krusa yu tromoi nating mani long em inap yu harim mipela na rausim setelmen long Kimbe taun?

Husat i kisim blok o i wok long gavman na kampani em i ken stap em i gat wok na gavman i save long em. Tasol husat i raun nating na i stap long graun bilong gavman i mas go aut.

Narapela samting tu Clement Nakmai yu mas save olsem i no ol Waira tasol i stap long graun i no bilong ol. I gat tu ol Wes Nu Briten i stap olsem ol Arowe, Bali, Kove, Gloucester na Vitu. Mista Nakmai yu mas stretim tok pisin bilong yu bikos Waira i no min Simbu na Sepik tasol. Yu husat bilong Wes Nu Briten yu stap tu long bus kem yu wanpela iligel setela.

Laspela toktok bilong mi em bilong wanem ol i no save baim pei long graun bilong gavman? Ol i yusim fri na mipela sampela tasol i baim rent. Dispela askim mi laik Clement Nakmai yu mas bekim.

**WARREN TULE
 KIMBE
 WES NU BRITEN PROVINS**

Lae maket i nogat inap spes

Dia Edita

MI LAIK salim komplek bilong mi i go long pablik long skelim. Komplek bilong mi olsem bikpela Lae maket i liklik tumas. Ples bilong salim kambang, smuk brus, kokonas, banana, kaukau, onion, bek, abus na planti moa liklik ol samting.

Spes i liklik tumas na paspas na i hat long ol baia long wokabout na baim ol samting bilong kaikai na dring bilong kollim bei. Na tu pasim spes long mipela sampela lain long kam long maket na maketim samting bilong mipela. Olsem na mi laik soim tingting tasol. Inap long yumi opim Lae Maket liklik na i gat spes long yumi long wokabout na baim samting. Em tasol bus manki i traim tok pisin tasol.

**EFANG JONAH
 MARE VILES
 MOROBE PROVINS**

Toksave:

Sampela ol pas mipela i kisim i longpela tumas na i no givim spes long ol arapela pas, plis raitim liklik pas. Na tu putim nem na adres bilong yu long olgeta pas yu salim i kam, tenkyu . - Edita

**REMECUS ALOUIS
 WEWAK
 IS SEPIK PROVINS**

Kampani na gavman i laik stopim tok bilong God

Dia Edita

MI BILONG wanpela distrik long Sepik em Ambunti na liklik ples bilong mi em Tongajamb.

Mi stap long Wewak taun na mi save autim tok bilong God olsem wanpela strit evanjelis long Wewak taun. Na mi lukim taun kaunsil wantaim ol bisnis haus na kampani i laik stopim pasin bilong autim tok bilong God insait long Wewak taun. Dispela

pasin mi no amamas long tok bilong God bai stop. Ol man harim i no wok bisnis bai bruk daun, nogat. Em supanaturel wok na itenel wosip. Skai na graun bai pinis tasol Tok bilong God i stap yet Mt: 24:35. Mi no amamas long kampani na gavman long stopim gospel long autim. Mi sanap insait long wanpela tok 'demokratik kantri'. Bikos PNG em wanpela haiden kantri na i kamap olsem

kristen insait long Gutnius bilong Bikpela Jisas Kraus.

Mi sanap long wanpela tok long Buk Baibel long John 8:32-36 i tok, toktru insait long Baibel bai mekim man i fri long sin na dai na hel tu. I nogat narapela rot long save - Aposel 4:12 i nogat narapela rot i go long heaven - John 14:6.

Wanpela rot tasol John 10:9; Timothy 2:5. Plis mi apil tu long ol lod

meya bilong narapela provins i no ken wokim olsem Sepik kampani na gavman i wok long stopim bilong autim tok bilong God. Harim! Gutnius em i strong bilong God inap long kisim bek man Rom 1:16 na mi askim tu gavman bilong papa Sir Michael Somare i ken lukluk na blesim ol man bilong autim tok bilong God long strit bilong provins insait long PNG. Ol dis-

pela kain wokman tasol i save seivim sol bilong manmeri i ken kam insait long Kingdom bilong God. Plis yu husat i ritim na yu laik long sapotim dispela tok olsem gavman long PNG i no ken stopim gospel, orait rait tasol long Wantok Niuspepa.



Samting bilong Gavman na samting bilong God

WANEM samting i bilong Sisa, givim long Sisa na wanem samting i bilong God, givim long God. Dispela em toktok bilong Jisas taim ol saveman bilong lo o ol parisi i bin laik traim painim rot bilong kotim em.

Dispela bikpela tok bilong Jisas long stori bilong Baibel em yumi save harim olgeta taim long traim trepim Jisas. Olsem na ol i salensim em yusim lo. Olsem na Jisas i mekim klia lo bilong graun o lo bilong Gavman na lo bilong God.

Ol parisi i bin traim long kotim Jisas olsem na ol i yusim lo bilong Gavman long dispela taim long traim trepim Jisas. Olsem na ol i salensim em yusim lo. Olsem na Jisas i mekim klia lo bilong graun o lo bilong Gavman na lo bilong God.

Sisa em olsem Praim Minista bilong Gavman long dispela taim na olgeta pipel i stap aninit long Gavman



bilong Sisa. Olsem na Gavman bilong Sisa i mekim lo bilong ol pipel bilong Israel i stap aninit long en. Na taim Jisas i mekim dispela tok olsem wanem samting i bilong Sisa i bilong Sisa, dispela i min olsem Jisas i luksave long atoriti o Gavman bilong dispela taim. Jisas i luksave long Gavman o atoriti na lo bilong en long ol pipel i bihainim. Gavman em bilong mekim ol lo o mak bilong ol pipel i stap insait gut na bihainim. Lo bilong Gavman i olsem bainat bilong God em i givim long Gavman long yusim. Dispela bainat em lo bilong Gavman. Taim gavman i kisim takis bai em i skelim gen long wokim ol haus sik, skuil, bris na rot na ol

arapela sevis bilong sevim pipel.

Em i soim olsem God yet i blesim dispela Gavman. Olsem na yumi ol pipel i mas luksave na rispektim Gavman na lo.

Yumi ol Kristen i ken go het long strongim wok bilong lotu na sevim God long Kristen bilip bilong yumi, tasol moabeta yumi Kristen i mas traim tu long yusim Kristen save na pasin bilong yumi long sapatim Gavman long kamapim gutpela atoriti na lo we i ken sevim gut ol pipel.

Olgeta taim Gavman i save tok long sios i mas wok bung wantaim ol. Olsem na yumi ol Kristen i gat dispela wok long makim sios na Gavman i ken wok bung wantaim yumi.

Ol memba i save holim Baibel na promis long ai bilong God na kantri olsem em bai mekim gut wok bilong sevim God na pipel bilong dispela

kantri. Ol polis na ami tu i save holim Baibel na promis olsem ol bai mekim gut wok bilong ol. Olsem na yumi ken lukim olsem God i luksave long Gavman na atoriti bilong em olsem na Kristen kantri olsem Papua Niugini i save mekim olgeta wok na ol samting bilong em na kolim nem bilong God insait long olgeta wok bilong em.

Wanem samting i bilong Gavman i bilong Gavman em yumi mas bihainim lo na wok bilong em na mekim gut bai dispela wok bilong em i ken sevim ol pipel na yumi long dispela graun. Wanem samting i bilong God em bilong God na yumi mas givim bek long em.

Dispela i min olsem yumi mas givim yumi yet olsem ofa i gat laip i go bek long God long strongim bilip na winim ki bilong kisim laip long Paradais.

Gutpela tingting long pasin bilong tilim wok

WANPELA bikpela wok insait long wok Lidasip, em pasin bilong tilim ol wok i go daun long narapela lidaman o ol memba bilong sios, kongregesen o grup.

Planti taim insait long wok lidasip bilong Kongregesen o seket o paris o sios, man o meri i stap lida em i save les o i no save wanbel long givim/tilim wok i go daun long arapela lida man o memba. Em i save gat sampela kain hait tingting we i save stopim em long tilim wok.

Nambawan tingting, em olsem, em i ting em yet inap long mekim olgeta wok lidasip olsem na em i no save tilim wok. Tasol long ekspirians bilong ol wok lidasip, kain lida i no save kamapim gut wok insait long paris o kongregesen. Planti wok i save pundaun na kamapim belhevi long ol membas.

Namba tu tingting, em olsem, sapos em i tilim wok long ol arapela man o memba, dispela man bai mekim wok

OL PRINSIPOL BILONG GUTPELA

wantaim Evangelist OHARE JABERE



gut tumas na bai em i winim em. Na dispela bai mekim ol memba long senisim em. Long kain pasin olsem, dispela lidaman bai traim long banisim lidasip posisen bilong em long pasin bilong mekim wok em yet.

Tasol yumi lidaman meri i mas save olsem tilim wok i go daun long narapela man o meri o long grup em i gutpela pasin lidasip. Planti save man bilong 'wok lidasip' i save soim sampela gutpela astingting bilong 'tilim wok'. Em ol dispela. Long pas bilong tilim wok:

I) Lidaman bai i gat 'inap' taim long mekim ol arapela wok bilong sios, o bilong paris o bilong seket o bilong

ministri;

II) Lida man bai larim wok we em i nogat save long mekim i go long ol memba o grup i gat save long mekim dispela wok. Dispela i no inap daunim wok lidasip bilong lida i tilim wok. Tilim wok em i bilong kamapim gutpela wok bilong seket o paris o kongregesen.

III) Ol memba bai luksave olsem ol i memba bilong kongregesen o grup o seket.

IV) Lida man i rausim wokpresa o hevi bilong wok long tingting na bodi bilong em. Sapos em i no tilim wok, em i ken kisim sik/wok presa.

Long Buk bilong Exodus/Kisim Bek 18:1-27 Moses i luk klia long pasin bilong tilim wok.

Moses i ting em tasol God i makim em long mekim wok lida na wok 'jas' bilong ol Israel. Nogat arapela man bai mekim dispela ol wok. Em i sindaun moning i go inap tudak, jasim olgeta hevi bilong

ol pipel. Ol pipel i sanap long longpela lain, Moses, wanpis mas harim olgeta hevi - bikpela na liklik. Em i kisim taim. Em i nogat taim long mekim arapela wok bilong ol pipel.

Tambu bilong Moses, Jethro lukim dispela wokpresa Moses i kisim na em i stiaim em long tilim wok. Em i tokim em long makim sampela man i gat gutpela nem long komyniti long helpim em. Wanem hevi i bikpela em i ken salim i go long Moses.

Wan man Lidasip - planti wok i save pundaun, na planti memba i save lusim kongregesen. Tasol lidasip we i save praktisim pasin bilong tilim wok, planti gutpela wok i save kamap insait long kongregesen.

Lida i no save tilim wok, em i lida i save sot yet long gutpela tingting na save na kain lidasip olsem i gutpela long rausim hariap, nogat kongregesen na sios i bagarap.

WANTOK KOMENTRI

Opim PNG i gutpela, na ol hevi?

PRAIM Minista Sir Michael Somare i bin tokaut long ol nius manmeri na bisnis bilong Australia olsem nau yet gavman bilong yumi i opim gen Papua Niugini i go long wol long strongim bek ikonomi bilong kantri.

Dispela em i gutpela tingting, na em yet em i nambawan mausman bilong yumi hia long PNG. I gutpela tu olsem Sir Michael yet i tok klia long ol olsem ol i noken tromoi nating toktok olsem PNG i save kaikaim bikpela helpim mani ol pipel bilong Australia i save givim.

Dispela samting em planti long mipela yet hia long PNG i save olsem taim Australia gavman i save givim mani long PNG, ol i save tok olsem mani i go long helt na edukesen. Tasol long taim bilong givim wok long karimaut ol dispela projek, ol i save givim wok long ol kampani bilong Australia yet o ol kampani we ol Australia manmeri i bosim.

Em nau mani i save go bek long Australia na i no bilong stap insait long kantri.

Sir Michael i tokim ol olsem PNG i gat bikpela amamas long Australia i save givim helpim mani. Tasol bikpela askim bilong em i go long ol nius manmeri bilong Australia em ol i noken opim maus na mekim ol kain kain toktok taim ol i no save long tru tru stori bilong sindaun bilong PNG.

Dispela yia em i wanpela bikpela yia bilong PNG. Na tu, i gat planti bikpela bung we mipela i go pas long en. Kibung bilong turisim insait long Pasifik i kamap long dispela wik na long wik antap, bai Pasifik Ailans Forum kibung bai go het. Olgeta dispela samting em ol gutpela samting bilong kantri, long wanem em i givim sans long yumi bilong soim tru tru kala bilong PNG.

Tasol long wankain taim tu, i gat ol hevi i stap we mipela i mas luksave long en na daunim nau. I no bihain.

Wanpela bikpela hevi nau i stap insait long kantri em dispela sik nogut HIV/AIDS. Bikpela tok lukaut i kam wantaim moa long K166 milien helpim mani we Global Fan i givim. Sapos mipela i no strongim pait agensim dispela sik, bai mipela i bagarap.

Long narapela sait, hevi bilong bikpela pisin sik we i bin kirap long Esia rijen, nau i ken kamap insait long kantri. Nesenel Agrikalisa Kworentin Inspeksens Atoriti (NAQIA) em ol saveman bilong pait agensim dispela kain ol sik.

Tasol ol i tok ol i nogat inap mani na wokman long mekim gut dispela wok lukaut. Sik bilong ol pisin i ken kamapim wankain hevi olsem sik HIV/AIDS insait long dispela kantri. Gavman i mas lukluk long ol dispela samting tu. Sapos mipela i pulim dispela sik bilong lukim na lusim, em nay bai yumi bagarap. Stretim ol hevi kwiktaim.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia 52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Morobe So nius

Strongim wok didiman

Bustin Anzu i raitim

PAPUA Niugini i mas strongim wok didiman long skelim namba bilong samt- ing i kam insait long kantri (impot) na samt- ing i go aut long kantri (ekspot) bai tupela i kamap wankain.

Gavana bilong Morobe, Luther Wenge i mekim dispela singaut i go long agrikalsa sekta long em i mas wok wantaim dispela tingting bihain long em i opim 2005 Morobe So long wiken i go pinis. Tu, em i singaut long ol fama na ol kampani long sapotim tingting bilong gavman wantaim dispela ekspot driven ikononik rikaveri program.

Gavana i tok nau yet namba bilong impot i winim namba bilong ekspot na em i tok em i laik lukim bai i gat planti samt- ing we mipela i mas planim insait long kantri na salim i go aut long daunim namba bilong ol impot.

Em i tok agrikalsa sekta i mas go pas na lukluk long dispela na helpim gavman wantaim tingting bilong em long strongim ikononim na strong

bilong mani bilong yumi.

Moa long 70, 000 manmeri i bin kamap long so, maski i bin i gat ren long moning taim long Sarere na Sande. Kain kain pilai i bin kamap long dispela so wantaim ol waitskin i kamapim pilai bilong ol, ol singsing grup na ol narapela kain pilai. Ampitiata tu i pulim ol lain bilong amamas long musik.

Planti pipel long so i yusim ol ambrela na i go i kam long get bilong so na amamas long lukim dispela namba 45 Morobe So. Ol singsing grup i kukim ples bihain long ren i pinis na i laik go olsem long apinun.

Wanpela paiawoks kampani bilong Australia tu i mekim bikpela wok long Sarere nait na Sande apinun long wokim paiawoks we em i save wokim long olgeta so long pinisim so wantaim gutpela tingting.

Gavana Wenge i tok strong tu i go long Trukai Rice kampani long groim moa rais long kantri na daunim mak bilong K600 milien we kantri i save baim long impotim rais olgeta yia.

"Markham Veli, Ramu, Sepik, Garaina na planti hap long kantri i gat gutpela graun we ol saveman bilong graun i tok em i gutpela long planim rais. Olsem na mi laik bai Trukai Rice kampani na ol narapela ol kampani i save impotim rais mas lukluk strong long dispela rot na ekspotim sapos i gat rot olsem," Mista Wenge i tok.

Wankain rot, em i tok, mas kamap long ol narapela samt- ing olsem kopi, kakao, kopra, bulmakau na ol narapela didi- man samt- ing.

Em i tok: "Dispela tu bai kamapim wok bilong ol man- meri, helpim rot bilong takis na kamapim gutpela sindaun insait long kantri."

Em tu i tok amamas long ol lain bilong Morobe so long wok hat long kamapim dispela so.

Em i tok promis olsem long 2006 so, Morobe Provinsel Gavman bai wokim tupela vis- itas' sten long mani mak bilong K120, 000. Dispela em long wanem, long olgeta Morobe so, planti visita long narapela hap graun i save kam raun long lukim so.

Polis putim displei

Bustin Anzu i raitim

TRIPLELA polis bilong Morobe Provins husat i bin go wok long Solomon Alan olsem pis- kiping misin i bin putim aut ol wok bilong ol long 2005 Morobe Agrikalsa (Didiman) So long wiken i go pinis.

Ol i bin putim ol piksa bilong wok bilong ol aut long ol man meri i ken luksave long wok bilong ol wantaim ol wan lain pisin bilong Solomon Ailan long wanpela liklik stol o haus long so. Planti man na meri i bin lukim ol dispela ol poto na tu askim ol plisman planti ol

askim. Sif Sajen Sam Sodeng i tok dispela ol piksa ol i putim em long toksave long wok bilong ol long narapela hap graun wantaim plisman na plismeri bilong Papua Niugini long las yia kam inap dispela yia.

"Mipela i soim ol man meri bilong mipela insait long so graun long wok misin raun bilong mipela ol plisman na meri.

Dispela raun bilong mipela igo long Solomon Ailan em namba wan taim bilong polis long lusim kantri na go.

Olsem na wanem wok mipela i wokim long hap em mipela i soim ol pipel bilong mipela, long wanem ol i luksave olsem dispela raun bilong mipela long i go i no wes nating," Sodeng i bin tokim Wantok Niuspepa long so graun long Lae.



MEKIM WOK: Polisman James Luan i bisi long mekim wok long opis bilong ol long Morobe So.



MERI POLIS: Sampela long ol polis meri husat i bin go raun wok long Solomon Ailans i bin stori long raun na wok bilong ol long wanpela displei bilong ol long Morobe So.

Kaikai



PRES KAIKAI I PULAP: Tomato yah i redi gut tru long kaikai olsem bret senwis o go insait long pot.



SANS KUMU YA: Patrick Gavali i kisim gutpela sans tru bilong baim ol kumu long Intanesenel De bilong Kaikai long Pot Mosbi Fama Trening Senta long Bomana.



SKUL RAIS: Em i olsem, wanpela saveman i soim stretpela rot bilong rausim skin bilong rais.

ai na kalsa

...em strong bilong PNG pipel

Andrew Molen i raitim

KAIKAI na kalsa bilong wan wan pipel long em samting we i mekim yumi i stap laip long wanem hap yumi stap long en. Dispela em i as tingting bilong "International Food Day" o intenesenel de bilong ol kaikai we i pundaun long las wik Sande (16 Oktoba).

Het tok bilong dispela bikpela de long tok inglis i go olsem; "Agriculture and Intercultural Dialogue." Dispela long tok pisin em i olsem, agrikalsa na we bilong wan wan kalsa na pasin tumbuna bilong ol wan wan manmeri bilong wan wan ples i save bung na wok namel long ol.

Long amamasim dispela de, Nesenel Dipatmen bilong Agrikalsa an Laipstok (DAL) i givim wok long Pot Mosbi Fama Trening Institut long holim wanpela so we ol i soim kain kaikai, ol animal na ol narapela samting bilong agrikalsa wantaim.

"Wan wan ples i gat we bilong ol long planim, lukautim na rausim kaikai taim em i redi.

"Taim ol i luksave olsem we bilong narapela i gutpela moa, orait ol i save traim na dispela pasin bilong bungim tingting na save bilong wan wan i ken helpim olgeta na dispela em i as tingting bilong dispela internesenel de bilong dispela yia," John Mebil husat i go pas long ronim dispela so i tok.

"We bilong ol Hailans long

planim kaukau i no wankain olsem bilong ol nambis na we bilong ol nambis long pasim banana bai em i mau gut i no olsem bilong ol Hailans," Mista Mebil i givim tok piksa.


Sampela bilong ol lain i kamap long soim ol wok na sevis bilong ol em: DAL (Dipatmen bilong Agrikalsa na Laipstok), Fresh Produce Development Agency (FPDA), Nesenel Agrikalsa Risets Institut (NARI), Hope World Wide (HWW), Christian Children's Fund (Australia), Ioubouna Kouba praimer skul, Pot Mosbi Fama Trening Institut, Mesime grup bilong ol meri, Garina grup bilong ol meri na Simbu grup bilong ol meri.



MEKIM OLSEM: Wanpela narapela man i skulim ol manmeri long rot bilong brukim rais na mekim plaua.



ABUS YA: Ol rebit tu em abus tu bilong yumi long kaikai yah.



LUKAUTIM PATO: Polangou Molean i was long ol pato i stap long Pot Mosbi Trening Senta we Intanesenel De bilong Kaikai i bin kamap.



SKELIM AIGIR: Aigir bilong Is Nu Briten i gat swit tu ya. Miriam Babate (han sut) na Zila Koni bilong Niugini Ailans grup i skelim hap aigir bilong wanpela meri i raun lukim agrikalsa so.

Nu Allan Inta Skul Kaisarel festival kirapim bek kalsa

PASIFIK WEI:
Ol sumatin
meri ya
i putim
naispela
Pasifik
danis



Robert Aneisia
i raitim

KALSEREL Festival long Mongop Hai skul insait long Nu Ailan provins i bin pulim planti handret sumatin husat i bin soim olsem pasin kalsa em i bikpela samting we ol i mas skruim i go moa.

Dispela em i namba wan kain festival olsem we Mongop Hai skul em wanpela Katolik Hais skul tasol insait long Nu Ailan provins i bin hostim. Ol arapela skul olsem Madina na Utu Hai skul, Lemakot Vokesenel, Fissoa na sampela praimer na elementeri skul klostu i bin stap insait long dispela festival na soim olsem ol sumatin i wok long lainim ol pasin kalsa.

Mongop Hai skul i gat moa long 400 sumatin long Gret 9 na 10.

Siaman bilong festival Robert Aneisia i tok ol bin holim dispela kalsarel festival bikos em i gutpela long ol skul i putim ol progrem i sut long kalsa insait long progrem bilong ol. Dispela em long lainim ol sumatin long ol pasin kalsa na em i no inap dai.

Deputi Nesenel Edukesen Seketeri Damien Rapese husat i bin stap insait long dispela festival i bin tok "cultural identity" o luksave long pipel long kain kalsa yet bilong ol na developmen em i wanpela long ol samting i stap insait long Nesenel Edukesen Plen bilong 2005 inap long 2014.

Wanwan skul i bin stap insait long dispela festival i bin gat haus win long soim ol ats na kraf olsem ol skrin printing, somap, oi basket ol i wokim long ol pandanus na kokonas lip, ol kaving, ol fenitja, ol peinting ol i wokim long wesan, ol kuk kaikai, ol poem ol i raitim na putim piksa wantaim, ol stori, ol droing na piksa.

Pastaim, ol skul sumatin i bin ritim ol poem na ol stori i go long ol pipel i bin stap long dispela so. Sampela sumatin i bin wokim kain dresap bilong ol long ritim ol stori na poem. Ol manmeri i bin amamas na kilim lap long harim ol pani stori ol sumatin i bin tokim long em long Tok Pisin. Bihain long dispela, i bin gat ol stringben singsing.

Bihain long belo, ol kalsarel danis i bin kamap. Man, ol kain naispela stail i bin kamap taim ol sumatin i putim kamap ol tumbuna danis na singsing bilong ol wan wan hap long Nu Ailan olsem Lihir, Tabar, Tanga, Lavongai, Namatanai na Sentrel Nu Ailan. Ol tumbuna bilas ol sumatin i bin putim long het na bodi i naispela tru.

Ol manmeri na pikinini i bin amamas tru long lukim ol kain stail danis i kam long ol wan wan eria. Tumbuna na wip danis i bin pulim planti manmeri long em na maski em i ren, ol bin hatim tru ol tumbuna danis na singsing na ol arapela samting i bin stap long progrem bilong dispela de.

Dispela so i bin kamap long las mun long tupela de na em long Fraide Septemba 9 na Sarere de namba 10.

Long Sarere moning, ol bin wokim ol kwaia singsing na long apinun, moa tumbuna singsing na danis, ol Pasifik danis na ol danis bilong nau. Laspela tredisenel danis i bin pinis wantaim Tumbuan.

Festival i bin pas wantaim stringben singsing na danis ol Fissoa Vokesenel sumatin na Mongop hai skul ben i bin putim kamap. Planti man meri na pikinini i bin amamas na joinim danis wantaim ol Fissoa na Maongop sumatin.

Mista Aneisia i tok festival i bin givim ol suamitn taim long redim ol kalsa samting we ol i bin putim kamap. Ol dispela samting i bin developim ol kalsa skil o save na ol gutpela samting olsem luksave na amamas long aidentiti o kalsa bilong ol yet.

Mista Aneisia i bin salim bikpela tok tenkyu i go long komiti i bin go pas long dispela kalsarel festival, ol sumatin na tisa na komyuniti long kamapim gutpela so. Em bin tok tenkyu tu i go long ol tisa bilong ol wan wan skul i bin kamap long so, provinsel edukesen opis, polis husat i bin redim ol hauswin na kaikai.

Em i tok ol bai mekim dispela samting long olgeta yia na namba tu bilong em bai kamap long neks yia.

Lukim moa piksa long
pes 21

HYUNDAI HD65 WE'LL GET YOU MOVING



ANNIVERSARY SPECIAL K67500 DRIVE AWAY

Hyundai's new HD65 gives you more strength, power, comfort and economy
Everything you need to keep you ahead of the competition.

- New D4AF engine
- Telescopic Steering Column
- Expansive windscreen

- Power Steering
- Fold down side and tailgates
- Carrying capacity of 3.6 tonne

- Extra large bumper
- Tilt Cab (for ease of servicing)
- Recessed door handles



Port Moresby 325 5788 Lae 472 4733
Mount Hagen 542 2100 Kokopo 982 8514



PNG MOTORS
WE ARE PNG PEOPLE

Call us today to experience the all new Hyundai HD 65 for yourself!



SAMSAM: Ol skul sumatin i holim strong kalsa

Kalserele de Selebrense long Mongop Hai Skul long Nu Ailan provins. Lukim ol kain stail bilong ol Bilas Ples. Ol Poto: Robert Aneisia



DUKDUK STAIL: Dukkduk em i stap strong long kalsa bilong Nu Ailan na Is Nu Briten.



HATIM TRU YAI: AMAMAS long soim strong tumbuna pasin.



GITA TAIM: Ol Karanas manki i no isi long soim tail gita paitim bilong ol

Tumbuna hebs marasin gat kik tu ya



TUMBUNA MARASIN I GAT KIK: Ples hebs marasin dokta, Solomon Meuro i soim ol marasin bilong em long Goroka, Isten Hailans. Sapos marasin bilong waitman i abrus, traim hebs marasin, long wanem em i gat kik tu ya

Sape Metta i raitim

BIPO long yumi i go het wantaim dispela stori, yumi mas lukluk na traim ong skelim dispela bikpela askim.

Long bipo tru long taim bilong ol tumbuna, ol lain manmeri na ol pikinini long ples, viles na haus lain i save kisim wanem kain ol marasin long taim ol i save painim ol sik olsem bel i pen, pekpek wara, het, baksait na bun i pen, malaria, kol sik, kus na ol arapela sik nabaut, na tu ol i save yusim wanem kain ol marasin long draim ap ol sua nabaut long skin bilong ol.

Toktok na askim ya i sut stret long ol tumbuna bilong yumi, long wanem long dispela taim bilong ol, ol i bin stap long strong bilong ol yet. Na bihain ol waitman i bin kam long kantri bilong yumi we ol i bin bringim sampela marasin i kam wantaim ol, na ol tumbuna i bin traim na luksave long dispela ol marasin.

Traim na luksave long marasin bilong ol waitman, em i samting we i kam bihain. Na ol tumbuna husat i no bin lukim ol waitman long bipo, na i stap long stron bilong ol yet, ol i save yusim o kisimwanem kain ol marasin taim ol i save painim sik. Dispela askim i wok long kamap bikpela nau long planti ol lain long ples, viles, hauslain na long ol taun na provins tu.

Ol askim ya i wok long kamap, long wanem, planti ol lain long ples na hauslain i luksave olsem i gat planti kain kain ol skin diwai, gras, lip, plaua, prut na susu o wara bilong ol diwai na gras we ol yet i nogat long ples bilong ol i ken kamapim ol strongpela kain kain marasin. Na bikos ol waitman ya i laik mekim moa mani long dispela

ol plaua we ol i painim long kantri bilong yumi, ol pasim tingting na save bilong ol tumbuna na ol i go het long hait pasin we ol i bungim dispela ol plaua long kantri bilong yumi, na ol i karim i go long kantri bilong ol na mekim kamap ol kain kain marasin we ol i tanim bek na salim bek long yumi na kisim planti winmani bilong ol yet.

Ol i mekim olsem na pulim planti milien kina i kam inap long tempela krismas i go pinis, planti ol as ples manmeri long PNG i karimaut ol wok painim na ol i painimaut olsem i gat ol kain kain plaua na bus marasin i stap long ol bus long ples, we olsem ol tumbuna i save kisim long taim ol i painim sik, i gro na i stap we ol i ken pikim, tanim, miksim na kisim long oraitim ol sik long dispela taim bilong yumi.

Nau yet planti long ol dispela lokol bus dokta o glasman husat i save kamapim dispela ol hebs marasin, i gat strongpela bilip olsem dispela ol hebs marasin i gat kik tu na i oraitim pinis planti ol manmeri na pikinini.

Wanpela long dispela ol lokol ples dokta o hebs marasin dokta husat i ting olsem em i oraitim pinis planti manmeri long ol hebs marasin bilong em, em Solomon Meuro bilong Tawansaru viles long kimi ilektoret long Okapa distrik, Isten Hailans provins.

Long taim Wantok Niuspepa i sindaun na toktok wantaim Mista Meuro, em i tok, long ples bilong em we i stap long boda na namel long Isten Hailans na Galp provins, i gat planti ol kain kain plaua i stap we ol i pikim na mekim kamap pinis planti ol kain kain hebs marasin.

"Dispela ol plaua em ol i hait samting long ples we mipela wan wan lain husat i save stadi long ol i save gut tru long wanem hap ol i

save gro long en. Na mipela yet i save pikim, bungim na mekim kamap ol hebs marasin," Mista Meuro i tok.

Em i tok em i bin statim na mekim kamap ol hebs marasin long yia 1995, we em i bin hait tasol na salim dispela ol marasin long ol lokol siklain long Isten Hailans na Simbu.

Bihain long wanpela krismas, em i go na lukim ol atoriti na ol dokta long haus sik we em i kisim tok orait long kamaut long ples klia long ol pablik ples na salim ol marasin.

"Taim mi kamaut long ples klia, salim ol hebs marasin long las tempela krismas, mi kisim bek ol gutpela risaf we planti manmeri husat i baim marasin long mi i kam bek na tokaut olsem sik bilong ol em hebs marasin i stopim na pinisim olgeta," Mista Meuro i tok.

Ol dispela lain i no moa kompien olsem sik ol i kisim long en i stap yet wantaim ol." Em i tok long rekot bilong em, hebs marasin bilong em i oraitim pinis tupela ten (20) manmeri husat i bin i gat sik HIV na AIDS. Sevenpela meri em sik kensa long susu i stap na pinis, na moa long 100 mama i kamap orait gen long sik kensa long bel (cervix kensa) we sampela long ol i karim ol pikinini na ol i stap helti.

Mista Meuro i tok hebs marasin bilong em i ken wok na oraitim moa long tripela ten (30) kain kain sik. Em i tok planti ol manmeri i painim sik na ol i wok long kisim marasin bilong ol waitman yet.

Tasol planti long ol i no orait. Ol i stap wantaim dispela ol sik na disis yet long bodi bilong ol.

"Sapos marasin bilong ol waitman i no inap wok, orait traim ol hebs marasin, em marasin i kam stret long ples na em i gat kik tu ya," Mista Meuro i tok.

Singaut long Swis Maunten i kam olgeta long PNG

WANPELA man bilong kantri Swisalen em mama bilong em i bin karim em long PNG i rilisim pinis wanpela musik albam long makim tripela ten krismas bilong Indipendens bilong kantri.

Dispela albam em i salim i go stret long ol gutpela poroman bilong em husat i stap hia na ol pipel em i bin save long ol taim em i bin bikpela long PNG.

Nem bilong albam em P.N.G, na nem bilong dispela man em Jay H. Em i rilisim dispela albam long Bern, bikpela sili bilong kantri Swisalen long mun i go pinis.

Na ol lain husat i save putim yau long Nau FM na Yumi FM redio i harim pinis dispela singsing P.N.G (Papua New Guinea).

Dispela namba wan singsing bilong dispela albam i bin pairap pinis samting olsem tupela krismas na mi yet mi bin kisim wanpela kopi bilong dispela albam taim mi bin wok yet wantaim Yumi FM.

Singsing pulim bikpela laik

Progrem Dairekta bilong Nau FM Shanique na wanwok bilong em Kas-T, husat em i sief musik dairekta em ol i tok P.N.G i wok long kisim gutpela askim long taim bilong independens long dispela yia long tupela redio stesin wantaim.

"Ol manmeri i harim singsing i harim nek bilong dispela man Jay na ol i save askim, wanem kain man ya?" Shanique i tok. "Taim dispela singsing i wok long pairap long Septemba, ol tain manmeri husat i save harim stesin bilong mipela i autim tingting olsem em i wanpela gutpela singsing tru na ol i bin askim long en tu."

Dispela albam em ol i bin rekodim long Bern na i gat wanpela ten tri (13) singsing em ol i singsing long tok pisin. Wanpela long tok inglis na narapela em i hap Swis na Jemen. I gat 6-pela gospel singsing, tripela em i singsing long ol wanfamili bilong em, meri bilong em Moni, pikinini man bilong em, Tim, wanpela singsing long wanpela pikinini bilong em



husat i bin dai long bel bilong meri bilong em na namba 12 singsing em i wanpela liklik stori long laip bilong em insait long PNG, London na Swisalen.

Mama karim long Kainantu

Jay H, em tru tru nem bilong em John Hanni. Mama i bin karim em long 1969 long Komperi, Kainantu insait long Isten Hailans provins. Papamama bilong em i bin ol misinari. Long namba wan 11 krismas bilong em taim em i liklik manki, em i save long Kainantu tasol.

"Papamama bilong mi, Henry na Ruth Hanni em ol i wok misinari klostu 20 krismas na mi ken tingim sampela gutpela taim tru long laip bilong mi taim mi bikpela long kantri we mi gat planti poroman yet long Isten Hailans na Is Sepik provins," Jay i tokim Glasim Musik. "Ol dispela poroman bilong mi em mi bin skul wantaim ol long Yonki, Aiyura, Munduku na Wewak."

Singsing long PNG laip

Jay i tok ol singsing bilong em i bihainim laip bilong em na tu laip bilong em insait long PNG.

Em i bin stap long Kainantu inap 1981 taim famili bilong em i go long Munduku, insait long bikbus klostu long Wara Kerowari long Is Sepik na em i save kalap long wanpela liklik balus long go skul long Wewak.



P.N.G: Karamap bilong musik albam P.N.G bilong Jay H.



MONICA: Misis bilong Jay H, Monica.

"Ron long balus long dispela taim em mipela ya," em i tok long strongpela tok pisin tru we em i bin lainim taim em i bin raun wantaim ol as ples manki. "Wanpela ron long balus em mi raitim singsing Balus i go Lus, em i namba tu singsing long dispela nupela albam."

Dispela singsing i stori long wanem samting i kamap insait long dispela liklik balus taim em i ron tupela de long Maunten Hagen i go long Tari na i go moa long Kiunga we balus i lusim rot bilong em taim em i go insait long bikpela klatut i pas antap long Bikpela Wara Flai. Balus i plai i kam daun olgeta na abrusim ol het bilong ol diwai. Ol toktok insait long dispela singsing i stori olsem:

"Mipela guria na mekim beten, leg i seksek olsem liklik manki stret,"

"Klostu laip em i pinis nau na balus abrusim diwai."

Tasol em i tok amamas tu long ol balus ron insait long singsing P.N.G we em i givim luksave long Papua Niugini, kantri bilong yangpela bilong em na em i wanpela kantri we em i no inap lus tingting long en.

"Mi laik kisim balus na flai long bus, yes PNG em kantri blong mi, yes PNG em kantri blong mi."


Bel blong mi i hevi long lukim man na meri bilong ol homtaun blong mi en i asples blong mi."

Wanpela arapela singsing we i wanpela bikpela singsing long albam em i wanpela i stori long ol 'raskolisim' o pasin raskol na dispela pret na pen dispela samting i save kamapim long ol komyuniti insait long ol bus taim bilong PNG we i soim olsem sindaun i no gutpela.

Lusim PNG

"Ol raskol tromwe ston na klostu kilim mi, wanpela raskol grup ron i kam," em ol namba wan toktok bilong singsing Wanpela Raskol Grup ol Ron i kam."

John Hanni i askim long gutpela tingting, stretpela tingting na gutpela sindaun long pinisim singsing wantaim ol toktok, Statim nupela laip pes, mekim nupela ples, em nambawan stret long olgeta, na bai



PAITIM GITA: Jay H i sanap paitim gita long Swisalen.

*Yu no stap hia blong mipela, mi givim yu long han blong wasman
Em i Jisas, em helpim blong mi na pren blong mi."*

Stap nau long Swisalen

John na Moni Hanni nau ol i stap wantaim famili bilong ol long Feriendorf Lake eria, Lenk insait long Berner Hailans bilong Swisalen we tupela i lukautim wanpela Holide Senta na we Jay H i save singsing olgeta nait bilong ol ges bilong em.

"Famili bilong mi na mi yet mi laikim tumas hia long hailans we ol maunten i gat ais antap long en na ol veli i nais tumas na i stap isi tru wantaim planti abus na ol arapela enimol."

Insait long wanpela singsing long tok ples Swis Jemen-Ingliis, nem bilong en At Lenk, John i singsing:

"Lenk is a beautiful place, yu can step out of life's hectic pace"

When you see the mountains high, the peaceful valley nigh

Cows and goats mow the grass, waterfalls are rushing fast

You can forget a little of your pain, when you see the peaceful plain

Yes I love to live in this place, to follow nature's beauty trace

All animals and people in this freedom, gaze in amazement"

Jay H, i tok tenkyu long papamama bilong em long stap tupela ten krismas insait long PNG, wanpela kantri wantaim naispela kala na pasin poroman em bai tingim long lewa bilong em olgeta taim. Em i tok tenkyu long Laurie bilong Nau FM long givim halivim bilong stesin bilong promotim dispela P.N.G. albam.

Matthias Heimlicher na Shannon Davidson i bin rekodim dispela albam wantaim Jay H na ol arapela musik man olsem March Ebermann, Daniel Graf, na ol arapela i pilaim ol arapela musik masin, wantaim Marc Lerigab na Matthias Heimlicher i singsing bekap long olgeta rekoding.

Piksa bilong John, we em i gat 35 krismas na narapela piksa taim em i gat 12-pela krismas tasol i raun wantaim ol pikinini Munduku long Is Sepik.

Wanpela arapela pikinini bilong misinari husat i mekim nem bilong em olsem musik man bilong ol PNG tok pisin singsing em Jason Hershey, O-Shen husat mama i bin karim em na em i bin bikpela long Finsafen distrik bilong Morobe provins.

Nau em i stap long Hawaii, Oshen i tok PNG em i as ples bilong em yet. Tasol i no long taim i go pinis, em i bungim hevi we ol musik man bilong Finsafen i bin agensim em long kisim sitisensip bilong PNG.

****Yu ken ridim ol stori blong Musik olgeta Mande insait tasol long The National**

yu stap gut na ol manmeri tu, em tru bai yu amamas tru."

Jay H i bin lusim PNG long 1982 taim papamama bilong em Henry na Ruth i go bek long kantri Swisalen bihain long tupela ten krismas insait long PNG na long 1983 famili i go long London long mekim moa misinari wok na tripela yia bihain, John i bin mekim hai skul bilong em.

Em i bin go skul kapenta tu na mekim ol prektikel sesen long London bilong wanpela moa yia pastaim long papamama bilong em i go bek long Swisalen long 1986.

Bihain dispela man Swisalen i go stap 4-pela krismas long ami bilong makim kantri bilong em. Long 1990 Jay i strongim laik bilong em long raitim musik na mekim wok kapenta.

Fopela krismas bihain, em i mekim namba wan pablik konset bilong em. Em i singsing ol Swis Jemen singsing na em i bungim wantaim sampela tok inglis na tok pisin singsing.

Em nau long dispela taim long 1994, em i bungim meri bilong em Moni, husat em i bin laikim tumas na strong bilong em long namba 4 albam em i putim long singsing, Moni, Moni bilong Mi.

"O Moni meri blong mi, mi no laik lusim yu"

Miss Universe yu paradise girl, oltaim mi ting long yu, stap klostu tru long mi

Mi laikim yu moa yet"

Moni em i sotim bilong nem Monica i bin karim namba wan pikinini bilong ol, Tim long 1994 na John Hanni i bin raitim wanpela tok pisin singsing long en, Song Blong Pikinini, we em i bin rekodim na rilisim long dispela P.N.G. albam.

"Tim mi singim song long yu, mi amamas tru long yu."

Gutpela mama karim yu, mi laikim laip wantaim yu,

Nambawan pren blong mi."

Tripela yia bihain long 1997 namba tu pikinini man bilong em, Jamie i kamap, tasol em dispela namba tu pikinini em John na Monica i bin lusim long taim bilong karim na tupela wantaim i kisim bikpela sori. Long singsing Grief, John i singsing:

"Mi krai long yu pikinini blong mi, mi laikim yu tru"



Laikim Penpren

Nem: Aupa Ben Mandi
Krismas: 18 (man)
Adres: EBC Barabundora/Narikori, PMB No.2, Kainantu, EHP
 Save laikim: Pilai volibol, basketbol, soka, tok pilai, harim pop musik, raitim pas na senisim poto.

Nem: Hiso Benn
Krismas: 29 (man)
Adres: Navarai Plantation, PO Kimbe, West New Britain Province
 Save laikim: Lotu, pilai soka na wokim gaden na raun wantaim ol poroman na tok pilai.

Nem: Kable Kavae
Krismas: 25 (man)
Adres: C/- Seko Aniseya, Anderson Foodland, PO Box 415, Lae, Morobe Province
 Save laikim: Pilai gems, ritim niuspepa na bungim ol pren.

Nem: Nalex R. Nalengim
Krismas: 18 (man)
Adres: St Ignatius Secondary School, PO Box 41, Aitape, Sandaun Province
 Save laikim: Pilai soka, wokabaut long bus, go painim abus long bus, ritim Baibel, go long lotu long Sande, stadi na raitim pas.

Nem: Anastasia Saria
Krismas: 16 (meri)
Adres: Sassoya C/Mission, PO Box 682, Wewak, East Sepik Province
 Save laikim: Go long skul na pilai volibol.

Nem: Olivia Kamgar
Krismas: 17 (meri)
Adres: Mercy Secondary School, PO Box 580, Wewak, East Sepik Province
 Save laikim: Pilai basketbol, stadi na tokpilai.

Nem: Lore Harumia
Krismas: 19 (meri)
Adres: Sangara Vocational Centre, PO Box 120, Popondetta, Oro Province
 Save laikim: Tok pilai, raun long maket, ridim buk, lukim TV, harim musik, kaikai buai na pilai spot.

Nem: Shen Borai
Krismas: 20 (meri)
Adres: Sangara Vocational Centre, PO Box 120, Popondetta, Oro Province
 Save laikim: Raitim pas, tok pilai, go lotu, pilai spot, senisim poto na harim musik.

Nem: Peter Patrick
Krismas: 19 (man)
Adres: Bema High School, Via Lae PO, Lae, Morobe Province
 Save laikim: Pilai tas, go huk long wara, stori tumbuna, pilai soka, ritim buk na harim musik.

Nem: Elizabeth Vitolo
Krismas: 17 (meri)
Adres: Kimbe Secondary School, PO Box 225, Kimbe, West New Britain Province
 Save laikim: Pilai volibol, soka, tas, tok pilai na harim musik.



STORI TUMBUNA

BIPO bipo tru i gat ol famili i stap antap long wanpela maunten ol i kolim Aseonka long hap bilong Kainantu eria. Na dispela famili ol i wok long kaikai kaukau na taro tasol long olgeta de. Ol i no save kaikai

PISIN KOKI KAMAP WE?

wantaim mit.

Na wanpela taim papa i belhat na i tok. Olsem wanem na mipela save kaikai kaukau tasol wantaim taro long olgeta de. Na em i putim tok olsem long tumora em bai kisim pikinini man bilong em na bai tupela i go painim ol abus bilong kaikai wantaim taro na ol kaukau.

So papa i kirap long hap moning yet na em i stat kukim sampela kaukau bilong karim i go long bus. I go tulait i

kamap na em long moning taim. Na em i putim ol kaukau i gat insait long liklik bilum na kisim spia na bunara bilong em. Na samting olsem 6 kilok moning, papa wantaim pikinini i stat long tromoi lek i go insait long bus.

Tupela i wokabaut i go yet na long namel long ples na bus pikinini i hangre nogut tru na em i kaikai sampela kaukau. Na papa i tanim bek na i lukim boi ya i wok long kaikai i kam na papa i tok, Boi

stop long kaikai. Mitupela i no kamap long bikbus yet. Tasol boi ya i hangere olsem na em i pinisim kaikai. Na tupela i wokabaut i go i go kamap long bik bus.

Na papa i go sindaun aninit long wanpela diwai na em i tokim pikinini. Mi hangere nau yu kisim sampela kaukau, mitupela i bin kukim na karim i kam tu. Bai mitupela i kaikai pastaim na bel i pulap na mitupela i go painim abus.

Tasol pikinini i tokim papa olsem kaikai i pinis long rot. Na papa i askim em gen olsem pikinini i tok tru ol em i giaman tasol. Na pikinini i tok tru.

Taim papa i harim dispela tok em i belhat nogut tru.

Na em i tokim pikinini, boi, yu mas i stap long hia na bai mi go sekim dispela traipela diwai. Olsem taim mi kambek long bus mi save kilim planti long dispela kapul long dispela diwai. Na boi i tok bai em i stap na papa i trikim pikinini bilong em na kwiktaim tasol em i ran i go bek long ples.

Na pikinini i wetim papa i go, i go tasol papa bilong em i no kambek kwik na boi i krai na singaut. Papa! Papa! Tasol em i no bekim tok bilong boi ya. Na em i singaut gen. Papa! Papa! Tasol nek bilong boi i popaia na i kamap olsem pisin Koki bilong PNG.

Na nau sapos yu lukim koki na tok halo koki, orait koki bai tok gen halo long yu. Bikos boi yet i kamap olsem pisin koki. Piksa bilong yumi PNG na stori i tok olsem. Stori yet i mekim olsem. Tasol yupela ol man i no ken mekim olsem na ol i katim target na planim. Em tasol.

Stori i kam long Kainantu, Isten Hailans provins




Inap Laiplain i givm mi sampela gutpela tingting long stretim hevi?

Dia Laiplain

Mi laikim tru wanpela man na mi laik maritim em. Tasol papa bilong mi i no laik long wanem, dispela man i no wanpela Kristen. Tasol mi ting olsem sapos mi maritim em, bai em tu i kamap Kristen. Olsem na mi no save watpo papamama bilong mi i no laikim mi long maritim em.

WORRIED

Dia Pren, Watpo yu no askim papamama bilong yu long wanem ol i no laikim yu long maritim dispela man?



Mi ting papamama bilong yu i laik bai yu marit gut na yu sindaun gut wantaim man bilong yu. Na bikos papamama i ting Kristen pasin bilong yu i bikpela samting, ol i laik yu maritim wanpela man i gat bilip na wankain tingting olsem yu.

Papamama i lukim pinis planti wari na hevi i kamap

namel long tupela marit i no wan tingting na wanbel long bihainim lo bilong Krai na sios bilong ol.

Wanpela de yu sindaun toktok wantaim papamama bilong yu long ol dispela samting. Autim tingting bilong yu na harim toktok bilong ol. Na i gutpela tu sapos yu bringim boipren bilong yu i go lukim papamama bilong yu. Na tu, em i gutpela long bringim em i go sampela taim long lotu bilong yu bai em i ken lukim na save long em. Em tasol.

Laiplain

Sapos yu gat wari o hevi, rait i kam long Lifeline, P O Box 6047, Boroko, NCD.

Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.

Laiplain



Bisnis bilong Groim Diwai insait long PNG - Planim diwai long ol renfores eria

Rot bilong groim ol spisis diwai i save groa insait long PNG

Arabica Coffee

Nem bilong en: Arabica kopi

Ples we em i save groa: Arabica kopi i bin kamap long of maunten insait long kantri Itiopia (Ethiopia) tasol nau of i save groim insait long planti Saut Is Esia kantri na Saut Amerika.

Wanem kain diwai: Em i save groa i go inap namel long 4 na 5 mita. Ol liklik han diwai bilong em i save sut i go aut long bikpela bun bilong em. Ol lip, antap bilong of em i dak grin na i sain na longpela bilong em namel long 5 na 15 sentimita. Sampela taim plaua bilong em i wait na i save bung namel long 2 na 20 wantaim. Of prut bilong of em ret o yelo na longpela bilong of inap long 15 milimita.

Rot bilong yusim: Of beri o prut bilong kopi em ol i save yusim bilong kopi prodaksen. Drai pipia rop bilong of prut bihain long ol i yusim em ol i save givim olsem kaikai bilong of abus, bilong mekim sop na bilong yusim olsem marasin bilong graun.

Gro bilong en: Taim em i gro long gutpela ples, em i ken gro long ples namel long 1300 na 1800 mita antap long mak bilong solwara. Em i save gro gut long of ples namel long 13 na 24 digri na long ples we i save kisim samting olsem 1900 milimita. Em bai gro long of ples we 750 milimita ren i save pundaun sapos ren i pundaun olgeta taim long wanpela yia. Wanpela sotpela taim bilong drai i save kamapim plaua long olgeta diwai long wankain taim. Em i save laikim graun we i gat planti gris na i no save hotim planti wara. Ol i save groim insait long olgeta Saut Is Esia kantri.



Lip na seri bilong Arabica Kopi



Wanpela han diwai bilong Arabica kopi



Ol seri bilong Arabica kopi

MCCARTHY & ASSOCIATES (FORESTRY) PTY. LTD.

National & International Forest Consultants

mccaf@datac.net.pg

"Long kisim tok stia long olgeta wok diwai"

Tupela nambawan meri sumatin bilong Hoskins stadim kopi long Aiyura

James Kila i raitim

TUPELA yangpela meri sumatin bilong Moramora Teknikel skul long Hoskins insait long Wes Nu Briten provins i brukim rekot olsem ol nambawan sumatin bilong dispela skul long go aut long provins na skul kopi long Isten Hailans provins.

Nau yet tupela i mekim prektikel trening wantaim Kopi Industri Koporesen - Wok risets na Growa Sevises Divisen long Aiyura.

Dispela tupela meri sumatin em Stella Gela bilong Hoskins long Wes Nu Briten na Miriam Joromo bilong Is Sepik provins tasol em bikpela long Wes Nu Briten na mekim skul bilong em long hap.

Dispela wok-ekspiriens o industrial trening bilong Stella na Miriam en nambawan taim tru long lukim ol sumatin bilong Moramora Teknikol Skul long Hoskins i bin mekim ausait long provins bilong ol. Dispela tupela meri i brukim rekot bilong dispela teknikol skul long go long Isten Hailans long kisim praktikol trening long sait bilong kopi industri bikos long bipo yet i nogat lain bilong ol i bin mekim wankain trening olsem.

Moramora Teknikol skul long Hoskins long Wes Nu Briten i save givim ol setifiket kos long ol sumatin. Nau yet dispela teknikol skul i gat samting olsem 700-sumatin husat i lainim wok agrikalsa, oto-ilektrikol, oto-mekanikol, ilektrikol, mekanik, welding, panel-biting, kapentri na plaming.

Stella wantaim Miriam em tupela agrikalsa student husat em skul bilong ol i salim ol i go wokim prektikel ekspiriens nambawan taim tru long sait bilong dispela kes-krop kopi.

Tupela i mekim fainol yia bilong tupela insait long dispela tupela yia skul program bilong ol.



SKUL KOPI: Stella Gela long han kais wantaim Miriam Joromo i glasim seri bilong kopi long CIC risets stesin long Aiyura, Isten Hailans provins. Foto: James Kila

Bihain long dispela em skul bai glasim ol na sapos ol i mekim gut orait ol bai salim ol i go long skul long Vudal o Popondetta Agrikalsa Koles.

Tupela bai stap tripela mun olgeta long dispela praktikol expiriens bilong ol wantaim CIC long Aiyura. Bihain ol i go bek long Wes Nu Briten taim prektikel bilong ol i pinis long neks mun ol bai mekim wanpela ripot bilong ol i go long prinsipol bilong skul.

Long nambawan wik ol i bin lainim sampela samting long sait bilong wok long fam. Bihain ol i muv i go long fektori seksin we ol i lukim wanem ol wok ol wokman long fektori i save mekim taim ol i kisim ol kopi long gaden i go long fektori long prosesim.

Dispela tupela meri Wes i tokaut olsem ol i amamas tru long skul bilong ol long salim ol i go long Isten Hailans na long CIC-Risets na Groas Sevises Divisen risets senta long mekim

prektikel bilong ol. Miriam i tokaut olsem em i lainim planti samting long dispela kes-krop em kopi. Em i tok kopi em wanpela isi rot long ol lain long ples insait long Hailans rijen long kisim mani.

"Mi lukim tu olsem kopi em wanpela bikpela kes-krop tru insait long wol na em wanpela bikpela komoditi long wol bisnis."

"Insait long PNG tu kopi i save bringim bikpela mani i kam insait long kantri long helpim ikonomi bilong yumi," Miriam i tok.

Stella i tokaut olsem insait long stap bilong em long Isten Hailans em i glasim olsem kopi i save bringim bikpela mani long helpim sindaun bilong ol liklik manmeri long viles na haus-lain.

"Mi glasim tu olsem kopi i save bringim kamap ol bikman-husat i save kamap olsem ol politisen o lida. Pawa bilong kopi long Hailans i strong tru," Stella i tok.

Cat® CS-563E CP-563E

Vibratory Soil Compactors



Designed to provide... Outstanding Performance, Reliability and Fuel Efficiency.

The 563E Series Compactors are high production units. Standard dual amplitude, changeable from the operator's station, expands the application range. Operate in high amplitude to get density on thick lifts in the fewest passes. Select low amplitude when operating next to structures, when approaching final density or to avoid fracturing aggregates. Patented eccentric weight design assures positive amplitude selection and helps extend vibratory system service life.

Hastings Deering



PORT MORESBY
Spring Garden Road, Hohola, PNG
Ph: (675) 300 8300 - Fax: (675) 325 0141

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LJHIR	986 4105	986 4107
KIMBE	983 5144	983 5144

Product People Commitment.
We deliver.



Tok Pisin News

Radio Australia
101.9FM Port Moresby

Tok Pisin Service
6am - 7am : 6080; 7240(KHZ)
7pm - 9pm : 5995; 6020; 9710; 1280(KHZ)

RADIO TOK PISIN PROGRAM	
TUNE IN: 101.9 FM	
Radio Australia Tok Pisin Program - stat long mun Mas 2005	
MANDE Moring	
6AM	Stesen Op - Nius Hetlain - Musik na ol intaviu
6.30AM	Nius na Karent Afes
7AM	Stesen Pas
Nait	
7PM	Stesen Op
7.01PM	Ol Hetlain na Program Priviu
7.15PM	Spots
7.30PM	Nius na Karent Afes
8PM	Helt
8.15PM	Musik
8.30PM	NIUS
8.40PM	Spots Riplei
8.55PM	Musik
9PM	Stesen Pas
TUNDE Moring	
6AM	Stesen Op - Nius Hetlain - Musik na ol intaviu
6.30AM	Nius na Karent Afes
7AM	Stesen Pas
Nait	
7PM	Stesen Op
7.01PM	Ol Hetlain na Program Priviu
7.15PM	Musik na Chit-Chat
7.30PM	Nius na Karent Afes
8PM	Mama Graun
8.15PM	Musik/Spots
8.30PM	NIUS
8.40PM	Helt Riplei
8.55PM	Musik
9PM	Stesen Pas
TRINDE Moring	
6AM	Stesen Op - Nius Hetlain - Musik na ol intaviu
6.30AM	Nius na Karent Afes
7AM	Stesen Pas
Nait	
7PM	Stesen Op
7.01PM	Ol Hetlain na Program Priviu
7.15PM	Musik na Chit-Chat
7.30PM	Nius na Karent Afes
8PM	Focus
8.15PM	Musik/Spots
8.30PM	NIUS
8.40PM	Mama Graun Riplei
8.55PM	Musik
9PM	Stesen Pas
FONDE Moring	
6AM	Stesen Op - Nius Hetlain - Musik na ol intaviu
6.30AM	Nius na Karent Afes
7AM	Stesen Pas
Nait	
7PM	Stesen Op
7.01PM	Ol Hetlain na Program Priviu
7.15PM	Musik na Chit-Chat
7.30PM	Nius na Karent Afes
8PM	Youth
8.15PM	Musik/Spots
8.30PM	NIUS
8.40PM	Focus Riplei
8.55PM	Musik
9PM	Stesen Pas
FRAIDE Moring	
6AM	Stesen Op - Nius Hetlain - Musik na ol intaviu
6.30AM	Nius na Karent Afes
7AM	Stesen Pas
Nait	
7PM	Stesen Op
7.01PM	Ol Hetlain na Program Priviu
7.15PM	Musik na Chit-Chat
7.30PM	Nius na Karent Afes
8PM	Wantok
8.15PM	Musik
8.30PM	NIUS
8.40PM	Youth Riplei
8.55PM	Musik
9PM	Stesen Pas
SARERE Nait	
7PM	Stesen op - Ol Nius Hetlain/Program Priviu
7.05PM	Musik na Chit Chat
7.30PM	Nius
7.40PM	Wantok
8PM	Lokal Ben
8.30PM	Nius
8.40PM	Musik/Chit Chat
9PM	Stesen Pas
SANDE Nait	
7PM	Stesen op - Ol Nius Hetlain/Program Priviu
7.05PM	Musik na Chit Chat
7.30PM	Nius
7.40PM	Femili Blong Serah (Radio Plei)
8PM	Lukluk Bek Long Wik
8.30PM	Nius
8.40PM	Musik/Chit Chat
9PM	Stesen Pas

PACIFIC BEAT

MUSLIM Komyuniti long PNG i egensim ol toktok olsem ol teroris i tagetim PNG

Muslim komyuniti long PNG i egensim ol toktok olsem gupela pren namel long PNG na Australia i ken pulim ol teroris i kam hait na karimaut nogut wok long tagetim Australia. Luther Wenge, em Palamen memba bilong Morobe husat i no save stap isi tasol i save autim tingting bilong em long planti bikpela samting i kamap long kantri i bin tok bihainim bom pairap we ol teroris i bin kamapim long Bali Ailan long Indonesia, we planti ovasis pipel i save go long painim amamas na malolo long en.



Luther Wenge, Gavana bilong Morobe

Man i Askim: Caroline Tiriman
Man i Bekim: Yacoub Amaki, Mausman bilong PNG Muslim komyuniti, Luther Wenge, Gavana bilong Morobe

TIRIMAN: Gavana Luther Wenge i tok ol Islamik ekstrimis o strongpela het hatlain Muslim olsem ol dispela i bin karimaut ol bom pairap long Indonesia i wok long tagetim ol kantri i bin go insait long Iraq wo olsem Briten, Amerika na ol poroman bilong ol we Australia i wanpela long ol.

Bihainim dispela, Mista Wenge i wokim strongpela tok lukaut long PNG Gavman long lukaut gut taim em i skruim wok pren wantaim Australia, bikos dispela i ken kamapim sekyuriti hevi.

Tasol ol Muslim komyuniti long Pot Mosbi i no sapatim tok lukaut we Gavana i mekim long ol samting i kamap na i sut long intenesenel level.

Yacoun Amaki, mausman bilong png islamik Ogenaisesen long Pot Mosbi i tok em i harim dispela toktok bipo.

AMAKI: Gavman i wokim planti toktok long midia na dispela em i wanpela tasol long ol. Mi no save we Gavana i wok long kisim ol dispela toktok na wokim kain stetmen olsem. Lukim, long lukluk bilong mi, nogat sans bai kain samting olsem i kamap. Ol bin askim mipela ol kain kwestem olsem tasol mipela i tok nogat. Komyuniti bilong mipela i liklik tasol na em i hat long kain samting olsem i kamap bikos olge-

ta man i save long wanpela narapela. Na sapos wanpela ausait man i kam long ovasis na i lasik karimaut dispela kain samting, bai em i hat tru bikos bai mipela i ripotim ol . bikos long PNG, yu lukim, yumi gat ol hauslain na wanpela husat i save lukauim wanpela narapela. Na dispela i no pasin bilong ol Muslim. Long dispela samting i kamap, em bai hat.

TIRIMAN: Yacoub Amaki.

Tasol Gavana Luther Wenge i tok taim PNG i tok em i pren long olgeta na i no birua long narapela ,gavman i mas go het long givim lukaut long sekyuriti na moa yet sovreinuti o em i wanpela indipenden kantri.

Na anit long dispela, PNG i mas noken go klostu long tumas long Australia gavman.

WENGE: Mi no kris long Australia. Mi tok Austrsalia i putim ol yet long posisen we i isi long ol teroris i tagetim Australia. Na sapos ol i kam stap long hia pinis, ol Muslim bai kisim pait bilong ol hia Australia na lukim olsem wok pren namel long Australia na PNG bai mekim PNG i taget bilong ol teroris wok.

TIRIMAN: Tasol wok pren namel long Australia na PNG i stap longpela taim pinis. Na wanem samting i nupela?

WENGE: Noken bisi. Noken bisi, maski wok pren i stap longpela taim, mi tokim yu Australia, Briten na Amerika i wok long pait egensim ol Taliban long Afganistamn na pait long Iraq wantaim ol Muslim. Koneksen i no stap tasol i no ol dispela kantri tasol tasol ol i gat ol Msuslim long Esia. Nayupela i save olsem Indonesia em i top Muslim kantri long wol bikos em i gat bikpela populesen bilong ol Muslim pipel long wol na ol i gat koneksen long hap. Mi ken tok olsem Ol Muslim i wok long pulim i go long ples bilong ol kantri we i pait egensim ol na ol i ken yusim koneksen bilong ol wantaim Indonesia long atekim pipel olsem ol Australia pipel na ol Britis an Amerika pipel, olsem ol i wokim long Bali. Na wankain samting i ken kamap long hia.

Pacific BEAT

4, 5, 6am & 4pm, 5pm including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

Bung wantaim mas stap: GG

Paul Zuvani i raitim

I GAT bilip olsem ol yangpela bitong nau inap long kamapim gutpela wanbel na wokbung pasin long kantri long bihain taim, Gavana Jenerol Sir Paulias Matane i tok taim em i holim morning ti wantaim ol opisel bilong Kwin Baton Rilie tos taim em i go long Vanuatu las Fraide.

Em i tok dispela i kamap ples klia long ol pilai na karim Kwin Baton Rilie tos i no narakain long dispela.

"Em i givim mi bikpela sapot long soim bikpela amamas long dispela Baton we i kam long kantri aninit long lukaut bilong PNG spot federesen na Komenwel Gem asosiesen long painim mani na salim PNG tim i go long 2006 Melbon Komenwel Gem," Sir Paulias i tok.

"Em i bilip bilong mi olsem mipela i mas givim sapot long ol spotmanmeri husat planti bilong ol i yangpela. Dispela i bung mipela. Gutpela piksa em mipela i yet i pilim o lukim na harim long nius long ol de i go pinis." "Dispela em i liklik piksa bilong wanem samting



Foto: PAUL ZUVANI

PUL KANU: PNG Spot Federesen jenerol seketeri Sir John Dawanincura i pul long kanu long Ela Bis las Fonde long las taim em baton bai go bek.

mipela i gat long naispela kantri bilong mipela Papua Niugini."

"Mipela i soim wanbel pasin taim mipela i karim baton long faipela provins we baton i to long en. Mipel i mas skruim yet dispela pasin long narapela 30 yia."

"Na wantaim kain sapot we i kamap, mi askim ol spotmanmeri bilong mipela long mekim gut na kam bek wantaim ol gol medol."

"Mi amamas olsem Papua Niugini i wanpela bilong ol kantri we i bung wantaim long dispela bikpela samting bilong Komenwel Gem long dispela wik we i raun long faipela provins bilong mipela."

"Dispela i soim olsem mipela inap long kamapim na lukautim gut ol dispela kain bikpela samting," Sir Paulias i tok.

Spot Profail



Foto: PAUL ZUVANI

Nem: **Leana Gari**

Krismas: **65+**

Ples: **Kwalimurubu, Rigo Distrik, Sentrel Provins**

Pilai: **Etlit (sprinta) 100m (bipo 100 yad).**

Ples i kamap: **Namba 5 long 8-pela rana husat i kamap long fainol ron.**

Pilai i kamap: **Komenwel Gem long 1962 long Perth, Westen Australia.**

Samting i mekim long dipela pilai taim: **Karim tos/ tos bera bilong PNG tim**

Tingting i gat long makim kantri: **"Taim mi yangpela tingting bilong mi i narakain taim mi makim kantri. Nau mi lapun mi pilim olsem em i bikpela samting tru. Dispela i givim mi bel isi na mi laik wanbel wantaim olgeta PNG manmeri."**

LAIKIM WANBEL PASIN (han sut) wantaim pikinini bilong em.

RAGBI LIG WARD 78 OFFSEASON RAGBI LIG RESIS

HOHOLA SPOTS OVAL

Raun 1 Sisen propa

Sarere Oktoaba 22, 2005

08:30 SI Sea Eagles vs Figgy Dumpers B

09:10 Toks Maroons vs Border Tigers B

09:50 Toks Warriors vs Kama Cowboys B

10:30 Valley Eels vs Hoks 2 United B

11:10 Taraga Dragons vs MB Reds B

12:10 SI Sea Eagles vs Figgy Dumpers A

1:10 Toks Maroons vs Border Tigers A

2:10 Tok Warriors vs Kama Cowboys A

3:10 Valley Eels vs Hoks 2 United A

4:10 Taraga Dragons vs MB Reds A

Sande Oktoaba 23, 2005

08:30 Hoks 2 Brothers vs LB United B

09:10 Mutrus Brothers vs Dorido Panthers B

09:50 Border Sharks vs JV Bulldogs B

10:30 BP Knights vs Garden Hills Eagles B

11:20 Hoks 2 Brothers vs LB United A

12:10 Mutrus Brothers vs Dorido Panthers A

1:10 Border Sharks vs JV Bulldogs A

2:10 BP Knights vs Garden Hills Eagles A

3:10 Possibles vs Probables [Rugby 7 selected]

KRIKET

POT MOSBI KRIKET

Sarere 22/10/05

A Gret

10:00 Mobil Steamships vs Lamania Mariners Amini

10:00 Raukele vs Bowmans Dogura Colts

B Gret

12:30 BNG Poreporena vs Bowmans Dogura HMS2

12:30 KCC vs TST Coasters Nomads

12:30 Chubb United vs Raukele MB

12:30 Kempa vs Taora Kempa

Sande 23/10/05

A Gret

10:00 BNG Poreporena vs OS Hoods Amini

10:00 TST Coasters vs Chubb United Colts

B Gret

12:30 Lamana Mariners vs Sup. Aroma Coast MB

12:30 Mobil STC vs PB Cheung STC

12:30 Curries vs Aussie Hi Com Nomads



YU BAI GO WE? Imondos pilai (7) i putim gutpela was long Kileng pilai taim em i kisim bai long 9 Mail soka. Kileng win 2-0.



MAKIM GUT: Dou Mavara bilong Chubb United we i helpim tim bilong em i winim TST Coasters long Pot Mosbi prisisen kriket pilai long las Sande.



RAIT YAH: Ol meri Chebu maski ol i lus long Wantok 3-2 (7-2) long fainol bilong kisim Kamara Kap long Pot Mosbi solbol meri tasol i no wari. Ol i amamas long kisim poto taim kemera man i tok long kisim poto.



NOKEN! Tupela Saints pilaia (han kais) i putim was na tok nogat long Titan pilaia long taim Titan pilaia i redi long skoa. Saints i win 44-41. Las Sande turangu Saints i lus long Exodus.




BILONG MI: Arite Namasu Kepsen Imindos i tok taim em i pasim rot bilong Kileng pilaia Martha David long em i no ken kisim bai long 9 Mail, Evedahana Soka Asosiesen soka resis long las Sarere long namba tu kwata fainol. Kileng win 2-0.



RAIT OLGETA: Weka Parom (han kais) bilong Wantok i mekim gut long helpim tim bilong em i winim Nancy Kamara Kap long Pot Mosbi sofbol taim Wantok i winim Chebu 3-2 (7-2) long Bisini Daimon las Sarere.




YU KAM: Jimmy Anapa bilong Mad dogs i ron wari sapos Jiwaka pilaia i putim was long pasim em long ron long Erima Tas resis long Pot Mosbi las Sarere.



YU TRAIM : Karl Guria(han sut) i no wari sapos Silas Piskaut i traim bros bilong em wantaim wan-pela kik nogut bilong em. Tupela bai pait long dispela namba eit nesanel kyhochsin Karate sempionsip long Sande Novemba 13 long Sir John Guise Stedum, Pot Mosbi.



GUTPELA SAPOT: Bodi bilda Lucas Wemin i sanap rop long bodi bilong em taim PNG Bodi Biding vais presiden Ronald Haihivu na Trukai seis meri Lucy Siki i sanap na lukluk.



DAI, SORI TRU: Atlanta Hawks senta Jason Collier i kalap long putim basket.

Collier i dai long las Sarere bihain long em long em i bungim sampela long pulim win na i stap tasol long haus, papa bilong em i tok. Long taim Collier i dai em i gat 28 krismas.

Jenerol menesa Billy Knight i tok nau yet oi i no painimaut hevi bilong dai tasol ol bai tokaut bihain long ol dokta i sekim bodi bilong em. Em i tok Collier i nogat rekod bilong sik long stat bilong 2005 sisen. Jeff Collier i tokim nuisman olsem pikinini bilong em i dai long ambulens long taim ol i ron i go long haus sik na i nogat ripot long dokta wantaim dispela hevi long skru.

Mausman bilong Hawks Arthur Triche i tok Collier i mas dai long hevi long lewa tasol i no inap long go moa long toktok. Em i tok nau yet tim i no inap tok klia long dai bilong Collier tasol bai tokaut long dispela long liklik taim.




TUPELA TWIN, BOB NA MIKE BRYAN: Dispela tupela twin brata Bob na Mike Bryan bilong California, Amerika i kwalifai wantaim long go insait long Australia open tenis sempionsip.

Tupela i kamapim nupela histri long makim bilong tupel twin brata. Tupela i namba tu tim long 50-ya (Paes-Bhupathi long 1999) long kamap long ol fainol long olgeta foapela Gren Slem tonamen.

Bihain long ol ius long ol fainol bilong Australia Open Roland Garros na Wimbledon, ol Bryans i abrusim dispela "anti-slem," long taim Mike i kolim dispela mak long winim US Open long ol i winim kain taitol long 24 taim.

Ol Bryan husat long 2003 i stat long winim tim taitol bilong ol. "Mitupela i amamas long kwalifai long Tenis Masta Kap. Mitupela i Mike lukluk long pinisim dispela sisen gut," Mike Bryan i tok.



WAS GUT YET! Namba wan golf pilaia Tiger Woods i soim yet olsem ol i namba wan pilaia taim em i winim \$US1.3 milien long Wol Sempionsip pilai long Amerika las wiken.

Dispela sempionsip i lukim ol top pilaia long wol i bung na pilai na traim long painimaut husat i namba wan bilong ol. Dispela i lukim Tiger Woods i stap namba wan yet. Em i namba 10 taim long Woods i winim dispela taitol. Dispela kain sempionsip i stat long 1999.

"Mi givim Tiger Woods inap ol tropi, na olsem mi mas larim na lukim narapela man i mekim," PGA Tua komisina Tim Fichem i tok long taim em i givim ol tropi long ol wina long las Sande long Harding Pak, Amerika.

Bipo long em i hapim kap i go antap em i opim tuptup bilong kap i lukluk i go insait long painim sapos i gat sampela mani i stap insait. I soim olsem em i laikim mani.

2005 sisen i bin wanpela gutpela sisen bilong Woods maski em i gat tupela pilai i stap yet long mekim bipo long ya i pinis em long go long Saina, Japan, Hawai na California.

Long planti wei dispela em samting we i mekim planti ol narapel yia i narakain long ol arapela.

Woods i stap klostu long golf we em i winim 33 long ol 36 pilai em i kamap long en.




YAH: Australia kriket tim kepten Ricky Ponting (antap) i kalap i go antap bihain long em holim bal egenisim Wol X1 tim long namba foa de pilai egenisim Wol X1 tim. Australia win 345 na Wol 1 190 long Mande.

Na Stuart MacGill Australia lek spina husat wankain olsem narapela Australia lek spina Shane Warne i bin givim hetpen long Wol X1 tim.

Long de foa long pilai egenisim wol tim Australia tim i pilai gut tru.


Planti ol pilaia long wol tim i no kamapim kain pilai em ol i mas kamapim.



Stuart MacGill

Long las Sande Tes pilai Australia i mekim gut long long kamapim 355 ran na planti save man bilong kriket i tok dispela em i hat tru long wol tim i mekim long kain wei ol i wok long pilai. I nogat wanpela sait i bin skoaim ol ran i go antap long 276 to winim Tes pilai long Sidni Kriket Graun (SCG) long taim Australia i bungim Inglan long 1896.

Na ol ripot i tok wol tim sapos em i laik lukim win i mas pilai gut tsol dispela i abrus long wanem long stat ol i pilai krangki long stat bilong pilai bilong ol. Dispela em bihain long ol i lusim tupela opena bilong ol Graeme Smith na Wirender Sehwag long Sande avinun.



MIPELA WIN: Chicago White Sox namba wan pilai Freddy Garcia i kalap i go antap we ol wan pilaia bilong em i amamas wantaim em bihain long em i bout gut long helpim ol Sox i autim tiket bilong ol Los Angeles 8-2 long bikpela bes bol pilai long Amerika.

Ol ran bilong White Sox i stat taim Paul Konerko i opim rot bilong ron long namba wan ining na stat long dispela em i isi tasol long ol narapela pilaia long bihainim. Ol Sox nau i go pas long kopetisen long Amerika (besbol) Lig.

"Mi no ting mi gat ol toktok long mekim long tokaut long

kain wei mipela i pilai long en na long wanem samting i stap yet long mekim," White Sox lipov man Scott Podsednik i tok.

Garcia i autim sikipela Los Angeles pilaia long pitsing bilong em stat wantaim namba faiv straika bilong Angeles Mark Buehrle's.

"Stat long namba wan de pitsing bilong mipela i wok long go gut," Chicago menesa Ozzie Guillen i tok.

Na A.J.Pierznski i ran tu long helpim ol White Sox long wei em i skruim gutpela pilai bilong em long sisen.

Leeds Rhinos lus 6-15 long Bradford Bulls

Ragbi lig sempion



TRAIM TASOL I HAT: Marcus Bai

LEEDS Rhinos i lus long Bradford Bulls 15-6 long Iglans Supa Lig gren fainol long las Sarere. Rhinos em tim Marcus Bai i pilai wantaim long dispela taim na em i namba tu yia o sisen em Bai i stap wantaim na tu long go insait long gren fainol. Bai i joinim Rhinos las sisen (2004) we i lukim em i go insait stret long gren fainol. Tasol Bai bai lusim ol Rhinos long pinis bilong dispela sisen na bai joinim Bradford Bulls long narapela sisen. Bai husat i wanpela Papua Niugini man tasol we i kamap long ol bikpela pilai long narapela kantri long pastaim toktok bilong em wantaim *Wantok spot* i tok em i amamas long ol gutpela taim i kamap long em. Tasol em i tok em i no isi long em i mekim olsem long wanem em i hatwok tu long soim olsem em inap long pilai. Em i laikim olsem ol narapela PNG spot manmeri i mas bihainim lekmak bilong em tasol i tok long wankain taim dispela ol manmeri i mas wokhat. "Ol i mas soim olsem ol inap long pilai. Ol i mas tren hat na pilai hat," Bai i bin tok.

Wade laikim bikpela ol sponsa

PNG Ragbi Futbol Lig

PAPUA Niugini Ragbi Futbol Lig i laikim bai ol bikpela kampani i mas sponsaim ol SP Kap tim long lukim ol i tim i stap gut, Jeff Wade PNGRFL i tok long dispela wik. Em i mekim dispela toktok long tokaut long tingting bilong PNGRFL olsem ol bai amamas sapos ol bikpela kampani i lusim pasin bilong sponsaim ol lokol lig na lukluk moa long strongim ol bikpela tim olsem ol tim bilong SP Kap lig. "Mipela i laikim ol kampani olsem Toyota, Coca-Cola, Agmark na Brian Bell i ronim ol semi profesinol kompetisen na i no ol lig (olsem POM lig, Lae Lig na ol arapela). Mipela i laikim kain sponsa we bai i stap longpela taim na i no pinis long hap rot na kam aut long sponsasip. Em i tok planti tim i soim laik long joinim klab bilong ol long 2006 SP Kap pilai.

24 tim bai kamap

Ipatas Kap

INAP olsem 24 tim i tokaut long kamap long Coca Cola Ipatas Kap long Novemba 25-27 pilai. Sif ekskyutiv opisa bilong lig Timothy Lepa i givim nem bilong ol tim long dispela wik na i tok moa long 30 i soim laik long kamap. Ol tim wantaim long pul bilong ol em Pul A: Tabubil Diggers, Lae Tambuak, Porgera West, Goroka United, Wapenamanda Crushers, Kundiawa Masalai, Yoskom Royals, Ramu Crushers, Imbongu Knights, Ambum Panthers, Madang Warriors na Wabag Tambuaks. Pul B em Mosbi Tarangau, Popondett Batafai, Mendi Menjals, Kimbe Bullets, Lae Pirates, Kum Tigers, Okapa Hawks, Wagag Bulls, Tuwaex Raiders, Kumsek Cowboys, Madang Hawks na Goroka Dragons.

Maprik redi long holim Momase soka

Soka

LIKLIK Maprik taun long Is Sepik i tok welkam na redi tasol long holim 26 Momase rijinol soka sempionsip, lokol oganaising komiti siaman Scotty Inaka i tok.

Em i tok planti ol samting i redi na i givim bikpela tok tenk yu long lokol memba na Minista bilong Woks Gabriel Kapris long givim sapot.

"Dispela bai wanpela bikpela pilai long Momase rijon na olsem lokol oganaising komiti i redi long holim dispela pilai," Inaka i tok. "Mipela i hop dispela ol pilai bai kamap long trupela spirit bilong pilai."

Ol pilai bai kamap long foapela de olgeta stat long Fonde Oktoba 26 i go inap long Sande 30.

Wantaim K75,000 mani i kam long nesenel memba Kapris, lokol komiti i wok olgeta taim long lukim dispela ol pilai i kamap gut tru na i namba wan.

Dispela pilai we i save kamap long olgeta yia i bin kamap long Aitape, Sanduan provins las yia we i lukim Wewak i winim

taitol bilong ol man na Lae i winim taitol bilong ol meri. Nau-long dispela taim tupela sait wantaim i redi long was na difenim taitol bilong ol.

"Long redi long holim dispela ol pilai mipela i lukluk long olgeta sait long lukim olsem dispela ol pilai i kamap gut na long wankain taim i mekim olgeta manmeri i tingim yet kamap bilong dispela ol pilai."

"I tru dispela em i namba wan taim long Maprik i holim kain bikpela pilai olsem mipela i hop olsem olgeta samting i kamap gut na mipela i laik holim tu pilai bilong 2006."

Long kamap Inaka i tok olgeta rot bilong kamap long dispela pilai bai stap long han bilong wanwan tim tasol long kamap long Maprik em wok bilong oganaising komiti long lukautim. Olgeta tim bai stap long Maprik taun, Maprik hai skul na ol ples klostu long taun.

Sampela ol famili i tok long lukautim ol tim wantaim liklik K200 fi. Na LOC i lukluk yet long kisim K5000 mani long PNG Futbol Asosiesen na Momase rijinol soka federe-

sen. Nius bilong ol pilai long wanwan dei em nupela 95.3 FM Sepik Sentrol stesin bai tokaut long en. Dispela stesin i ken go long olgeta hap bilong Is Sepik, Sandaun na sampela hap bilong Madang.

Planti ol tim long Momase rijon i tokaut long kamap long dispela ol pilai we LOC i bilip olsem 30 man tim na 10 meri tim bai kamap.

Long wanwan ol senta em Morobe bai gat 13 tim, Madang 6, Sandaun 8, na Is Sepik yet bai gat 20 tim olgeta. Rejistresin i bin pas long Tunde hap aste em long Oktoba 18 tasol ol tim we i no rejista hariap i mas ringim hariap LOC long telepon namba 858 1212/858 1386.

Registresin fi bilong wanwan tim em K300 we dispela i go long PNGFA. Tasol ol tim we i no afiliat bai baim K500 registresen.

LOC i bin salim tok i go long Prait Minista Sir Michael Somare long kamap ges hona long opim dispela ol pilai.

Askim tu i bin go long foapela ol gavana long kamap tasol nau yet oganaising komiti i no kisim yet bekim i kam long ol.

Karate holim nesenel sempion

Karate

Paul Zuvani i raitim

MOA long 50 karate paitmanmeri bai pait long nesenel kyokushin karate sempionsip long Sir John Guise Indo Kompleks, Pot Mosbi long Novemba 13, sensie Waiter Schnaubelt i tok.

Schnaubelt i tok ol paitmanmeri bai kam long NCD, Lae na Rabaul na bai ol i pait long fulkontek.

"Bai i gat tupela grup. Open divison bilong man na Open divison bilong ol meri na long grup bilong ol yangpela bai i gat divison bilong anda 18, 16 na 12," Schnaubelt i tok. "Ol junia divison olsem anda 18, 16 na 12 bai pait wantaim ped."

"Ol paitmanmeri bai kam long olgeta hap bilong kantri na bai pait long ful kontek," em i tok.

Namei long dispela ol paitman Schnaubelt i tok bai i gat wanpela paitman i kam long Australia long pait tu.

Nau yet Sampson Benroy i sempion bilong Open divison bilong ol man bihain long em i winim Bernard Soari long 2003 nesenel sempionsip.

Schnaubelt i singaut tu long ol arapela masal at long kamap long dispela pait tu tasol i tok ol bai mas pait aninit long to bilong kyokushin karate.

"Mipela i singaut na askim ol narapela (masal) at tu long kamap na pait. Em i fulkontek na olgeta pait bai kamap aninit long to bilong fulkontek bilong kyokishin karate."

Schnaubelt i tok wanpela biknem karate



YAH! PNG karate sempion Samson Benroy (han sut) i kalap na mekim wanpela kik nogut long birua bilong em long bikpela pait las yia. Nau em bai difenim dispela taitol.

paitman Brian Semi husat i stop long pait long sampela taim i go pinis tasol nau i kam bek na bai mekim so tu long dispela taim.

Sempai Soari bai mekim demonstresen long dispela taim.

Fi bilong registresen na pait em K60 long Open man na meri divison na K50 bilong junia divison (anda 18, 16 na 12). Get fi em

K10 long ol bikpela man na meri na K5 long ol skul pikinini husat krismas bilong ol i 16 na go antap na K2 long ol skul pikinini em krismas bilong ol i stap long 12 na go antap.

Ol paitmanmeri husat i laik pait i mas kisim aplikesen fom long Wally's Bar na Grill opis Garden Hill o ringim Sempai Bernard Soari o John Changau long telepon namba 325 4534.

Australia skul putim ai long yangpela Magini

Ragbi lig

SWOKIN Magini, PNG Ragbi Futbol Lig anda 16 Kundu tim pilaiia husat i makim PNG na pilai long wol kap pilai long Rasia long las mun i kisim wanpela skolasip o pepa bilong tok bai skul na ples bilong em long skul long Australia.

Toowoomba Grama Skul long Kwinsten i lukim pilai bilong em na i amamas long kisim em i stap long skul bilong ol.

Long dispela wik Magani na famili i tok ol i amamas long kisim dispela ofa long wanem ol i laik Swokin i mas skul na pilai long hap. Toowoomba Skul i laikim Swokin i mas pilai long ragbi yunion tim bilong taim



GUTPELA TRU: Swokin Magini

em i skul long hap.

Swokin, 16, bilong Abua ples, Sentrel provins na i mekim Gret 8 long Hohola Demonstresen Skul i bin kisim bikpela welkam long kantri taim em wantaim Kundu tim i kam bek long kantri bihain long ol i kamap namba tri bihain long Australia na Frans long wol junia ragbi pilai long Rasia.

Long dispela wik Minista bilong Graun na Nesenel Memba bilong Abua Dokta Puka Temu i tok amamas na holim wanpela pati long en.

"Dispela em i gutpela stori long toktok long wanem i strongim tingting na hop long narapela ol pikinini long bihaini." Dokta Puka i tok. Em i tok em i gutpela long Swokin long wanem dispela i helpim em.

19 provins kamap nesanel gem

PNG Nesanel Gem

... i kam long pes 32

"Dispela nesanel gem i Olimpik Gem bilong kantri na em pilai we mipela bai luksave long sempion bilong wanwan pilai," em tok taim em i givim piksa long yangpela Toa Wisil na brata bilong em Elizah Wisil bilong Wahgi, Westen Hailans provins.

Tupela Wisil nau i save stap long Brisben, Australia wantaim Mae Koime na ol narapela rana na tren long hap. Em i tok long dispela as olgeta Wahgi na sapos nogat olgeta Westen Hailans spotmanmeri i redi gut long kamap long dispela ol pilai.

Askim em long bilong wanem na ol i no inap kamap Aglua i tok provinsol spot opis bilong ol i tok dispela ol nesanel gem i kamap long wankain taim em Milne Be i save holim provinsol Kula pilai bilong ol.

Tasol sapos dispela i tru askim i olsem wanem wanem pilai i bikpela provinsol o nesanel. Sapos em i nesanel bilong wanem Milne Be i no inap kamap na sapos ol pilai i kamap long wankain taim inap Milne Be i senisim de bilong ol na holim provinsol pilai bilong ol pastaim? Dispela em long redim tim bilong ol long kamap long dispela nesanel pilai.

Tasol dispela ol askim em Aglua i no inap bekim tasol em i tok sampela yangpela long Milne Be i tokaut long kamap long Goroka



KAMAP GUT: Toea Wisil (daumbilo na han sut tru) na Elizah Wisil (sanap) husat i bin stap long PNG tim long 2005 Palau mini Gem i stap wantaim PNG Etletik tim long taim ol i kamap long Jackson Intenesenel ples balus.

maski provinsol spot opis bilong ol i no givim sapat long ol long kamap. Ol 13 spot we ol provinsol bai kamapim tim long pilai em etletik, basketbol, bodibilding, boksing, hoki, dat, netbol, ragbi union 7, ragbi lig 9, soka, tas ragbi, wetlifting na vollbol.

Eitpela provinsol i baim pinis K500 rejistresen fi bilong ol. Dispela ol provins em NCD, Sentrel, Westen Hailans, Enga, Morobe, Madang, Niu Ailan na Oro.

De bilong ol provins i mas pinis long baim fi bilong ol em long tumora Fraide 21 Novemba.

Long graun tu Aglua i tok komiti bilong em i wok long redim gut ol ples bilong silip na holim ol pilai.

"5000 etlit bai kamap we nau yet mipela i redim pinis 3000 ples long ol long silip. Sampela ol famili long Goroka i redi long lukautim sampela ol pilaia o tim na i tok ol bai sasim dispela ol lain long K2.50 long wanpela nait."

Wantaim namba bilong ol etlit Aglua i tok Goroka bai pulap kapsait long bikpela namba bilong ol manmeri.

"Mipela i ting olsem inap olsem 30,000 bai kamap tasol long lukim kamap bilong ol pilai."

Ol pilai bai kamap long Embers Inn (dat), YC Hall (basketbol/boksing/wetlifting), Goroka Sekenderi (bodibilding/tas ragbi/hoki), NSI (netbol/basketbol/vollbol/etletik) na Sir Danny Leahy oval (ragbi union 7/ragbi lig 9). Aglua i tok em bai kisim olsem K300,000 long ogenaising komiti long holim dispela ol pilai na i tok ol i inap kamap long dispela mak.

Ol mani bai kam long NSI yet, Isten Hailans provinsol gavman, PNG Spot Komisen na PNG Spot Federesen.

Mesa sponsa em Papindo stua

Parom helpim Wantok long win

Sofbol

YANGPELA Weka Parom i helpim Wantok tim long winim 2005 Kamara Kap long Pot Mosbi prisisen meri sofbol pilai long Bisini Daimon las Sarere. Dispela 16-ya Kerema meri na Badiaghwa Hai Skul gret nain (9) sumatin maski bodi bilong em i no bikpela tasol strong bilong hamarim sofbol bal i narakain. Dispela i lukim em i palaim ol bal i go longwe long helpim tim bilong em i win.

Tasol bihain long tupela beta i go daun na taspela beta bipo long pilai i pinis Parom i nekim wanpela gutpela bal long namba tu bes we i lukim Anna Trawen na narapela poromeri bilong em na em i ran hom long lukim Wantok i winim Chebu 7-2.

Aninit long intenesenel lo bilong sofbol Wantok i mas mekim tasol tripela ron long win na olsem ron bilong Trawen i mekim Wantok i win maski long ranapela tupela ran.

Parom i kamap olsem namba wan bet meri long dispela gren fainol pilai. Bipo long dispela tupela tim i kamap long gren fainol Wantok i bin winim SP na Chebu i bin winim Admiralty long mesa semi fainol long go insait long dispela fainol.

Mavara win

Kriket

CHUBB United Dou Mavara i mekim 70 ran long mekim tim bilong em i go pas long TST Coasters long Pot Mosbi kriket pilai las Sande. Mavara i kamapim wanpela gutpela pilai we em i mekim 50 ran. Em i kisim helpim long wanpela top betman Mahuru Dai husat i mekim 44 ran. Na bikpela brata bilong Dai em Kou i mekim 17 ran namel long pilai. Bikpela hevi bilong ol boula em long boula namel long Mavara na Loa Sisia husat i kamapim 50 ran. United i bin mekim 265 ran olgeta we Sisia i mekim 43 bilong dispela ol ran. Empila Kini i kamap olsem namba wan boula bilong ol Coaster we em i kisim tripela wicket long 44 ran we dispela i kam long Kilian Amini, Solomon Amini na Jacob Mado. Long ol narapela pilai BNG Poreporena i mekim 7/221 i pas yet long Hood's husat i mekim tasol 149.

Hohola makim 7s

Ragbi union

OL opisel bilong Hohola ov-sisen ragbi lig long Sande i tokaut long 15-memba tim we bai kamap long MRDC Ragbi Union Ivaitezen Sevens long narapela mun. Lawrence Lobo i tok tim i kamap bihain long ol makim ol pilaia long pilai bilong ol long tim ol i pilai long ol. Tore Sarea i kosa bilong Tim Wan (1) na eks-Pukpuk Sukohe Tova husat i go pas long tim tu. Tim wan em Simon Ragatani, Simon Avora, Baba Aron, Patrick Anthony, John Horope, Joe Mondo, Kamilo Maino, Andrew Stone, Robert Mala, Robert Duplap, Collin Popaf, Mons Ivia, Jackson Dom, Auvroy Puto na Jacod Jidi. Tim tu em Seni Fred, Ugi Tai, Paul Ima, Komo John, Chris Paru, Richard Moripi, Danny Lahare, James Lucas, Aden Owen, Nelson Stone, Tau Leo, Pokana Gima....

PNG kamap long Saut Pasifik bodibilding sempionsip

Bodibilding


Paul Zuvani i raitim

BIPO Mista PNG na Saut Pasifik supa hevi wet (91+) sempion Donald Kaiwi bai taim gen long kisim taitol gen taim em i kamap long Saut Pasifik bodibilding sempionsip we bai stat tumora Fraide na pinis long Sande dispela wik long Tahiti.

PNG Bodibilding vais presiden Ronald Haihavu long taim bilong tokaut long wokabaut bilong ol long las wik i tok kamap bilong Kaiwi i givim pret pinis long narapela ol Saut Pasifik man.

"Kaiwi i gat nem long dispela divison na nau em i tokaut long kamap i mekim planti ol arapela kompetita long Saut Pasifik i pret pinis," Haihavu i tok.

Wantaim Kaiwi em Lucas Wemin long 75



EM YAH: Lucas Wemin laik kamap sempion.

kilo grem divison. Em i namba wan taim bilong Wemin long kamap long kain pilai olsem.

Haihavu i tok federesen inap long salim moa ol bodibilda tasol bikos long hevi bilong mani na we Kaiwi na Wemin inap long kamap wantaim K2500 levi bilong ol dispela i lukim tupela i go. Em i tok kos bilong wokabaut em i sanap long K7000.

Em i tok PNG bai holim dispela SP bodibilding sempionsip long 2006 long wankain taim. Em i tok tu olsem PNG inap long salim ol meri tu tasol bikos i nogat ol meri dispela i lukim ol man tasol i kamap long dispela ol pilai.

Ol bodibilding bai kompit long anda 65 kg divison, 70kg, 75kg, 80kg, 85kg, 90kg na 90+ kg.

Long taim bilong salim ol Trukai Industri sels meri Lucy Siki i tok Trukai i amamas long pas wantaim bodibilding na long sapatim ol long pilai bilong ol.

Pinampio mekim gut long Mosbi Paga Hill resis

LONG dispela wik Sarere ol rana bai kamap long Sir John Guise Stedum, Waigani Driav long namba tu resis insait long Spring i go inap long Sama taim.

Las wik Sarere strongpela win i bin wok long bagarapim ol rana long tima ol i laik resis i go antap long Paga Hill long las wik Sarere.

Tripela resis i stat long long Ela Bis na bihain i go antap long Paga Hill. Sotpela resis i olsem 2.4km na i go long Ela Bis tasol. Na 3.8km resis i kisim narapela hap gen moa na ol strongpela rana i go moa yet long antap long het bilong maunten tru we i kisim 6.7km long ron.

Antap long het bilong maunten i gat strongpela win tru na i gat planti ol spakman na dok na tru rot i bagarap iidik. Bipo dispela maun-

ten i bin gutpela tru na naispela long wokabaut tasol nau i luk olsem i bagarap pinis.

Long sotpela resis long Ela Bis David Rueben i winim na taim bilong em 8.14. Kesa Nathan i bin kamap namba tu (8.57) na Yukari Maring i kamap namba tri (9.43).

Milton lakosi i bin stat long dispela sotpela resis, tasol bihain em i laik bung wantaim ol lapun i laik i go antap long maunten.

Long 3.8km resis nupela rana Koyabe Pi i bin wok hat tru long winim resis na em i winim Noko Negosa inap long wanpela seken tasol (14.10. 14.11). Jnr Waki i kamap namba tri long taim 16.14 minit.

Long longpela resis ol rana i painim hat wok tru long maunten tasol long kam daun gen em i isi liklik.

Ol rana i bin mekim gutpela spit long kamdaun long taun i go olgeta long Ela Bis. Simon Pinampio i winim ol na em i givim siksti tru long kamdaun long maunten we i pinis long taim 26.15 minit. James Gurumi i bin wok hat long painim Simon tasol em i no inap painim em 27.14 minit.

Steven aivenzie i kamap namba tri long taim 28.02 minit na namba wan meri long pinisim longpela resis em Kristen Bisop husat i kamap na kamap long taim 36.35.

Tripela rana Paul Crouch-Chivers i kamap long taim 40.19 na Brendan Walsh i kamap long taim 40.22 na Mike Meadow i kamap long taim 40.28 i bin mekim gutpela resis long las 50 mita i kam bek long Ela Bis.

**LAE
BISCUIT CO.**



WANTOK SPOTS

**LAE
BISCUIT CO.**



19 provins kamap long PNG nesenel gem



Milne Be wanpela tasol no kamap

Pes 30

Maprik redi long holim Momase tonamen

MILNE BE: Pili nesenel Koroka tas tagbi im we luvji long 2003 nesenel tas tagbi

Paul Zuvani i raitim

OLGETA 19 provins i tokaut long kamap long namba PNG Nesenel Gem we bai kamap long Goroka long Novemba 13 i go inap long 19. Siaman bilong ol pilai Peter Aglua i tok Wantok Spot aste olsem olgeta provins husat i tokaut long kamap bai

kamap wantaim bikpela namba bilong ol spotmanmeri na opisel. "Klostu olsem 5000 etlit bai kamap long 13-pela spot," Aglua i tok. "Dispela em i bikpela namba em wanpela pilai i holim." Planti ol provins bai kamap wantaim 250-350 spotmanmeri olgeta.

"Na olgeta provins i tokaut long kamap. Milne Be provins wanpela tasol bai i no inap kamap," em i tok. Aglua i tok dispela em i liklik Olimpik Gem bilong PNG na i trupela pilai we PNG bai gat sans long luksave long lukim ol nupela sempion long wanwan spot.

I go moa long Pes 31***


SINGER INDUSTRIAL SEWING MACHINES

AT HOME WORLDWIDE

Prices from
as low
as K 1,995!


**SINGLE NEEDLE
LOCKSTITCH MACHINE**

Model 2491 D300A
Code: 112128
Complete with
table stand
& motor




**WALKING FOOT MACHINE
SINGLE NEEDLE HEAVY DUTY
LOCKSTITCH MACHINE**

Model 4411A566
Code: 171797
Lockstitch seaming medium
and heavy weight materials,
heavy clothing, canvas,
upholstery, automobile
trim etc...
Unison feed; large book
Complete with table stand & motor



OVERLOCKER

Model 1842U 065-5
Code: 116669
5 thread overlocker
with table stand
& motor



Istap long Soft Touch
First Floor, Brian Bell Plaza,
Boroko, NCD, PNG
Ph: 325 5411 Fax: 325 0167

Brian Bell
Shop with a friend